

四庫全書

經部

欽定四庫全書

經部

四書纂疏中庸卷二

詳校官大理寺卿臣富炎泰

刑部郎中臣許兆椿覆勘

總校官原任中允臣王燕緒

校對官典簿臣郭祚熾

謄錄監生臣查浩

欽定四庫全書

中庸纂疏卷二

宋 趙順孫 撰

朱子章句

君子之道費而隱

費符味反

費用之廣也 隱體之微也

語錄曰道者兼體用該隱費而言也。或說形而下

者為費形而上者為隱曰形而下者甚廣其形而上者實行乎其間而無物不具無處不有故曰費就其中形而上者有非視聽所及故曰隱。黃氏曰如今風雨之時滿室皆陰氣然不可見此體之隱也。其著人衣服則覺得濕潤著人膝理則覺得酸楚此顯而可見者用之廣也。然若人衣服身體即是那滿室陰

濕之
氣耳

夫婦之愚可以與知焉及其至也雖聖人亦有所不知
焉夫婦之不肖可以能行焉及其至也雖聖人亦有所
不能焉天地之大也人猶有所憾故君子語大天下莫
能載焉語小天下莫能破焉與去聲

君子之道近自夫婦居室之間

文集曰男女居室人事之至近而道行乎

其遠而至於聖人天地之所不能盡

語錄曰道無所不在無窮無盡

聖人亦做不盡天地亦做不盡

其大無外其小無內

語錄曰如云天下莫能載是無

外天下莫能破是無內謂如物有至小而可破作兩者是中若得一物在若云無內則是至小更不容破了可謂費矣然其理之所以然則隱而莫之見也

文集

曰大抵自夫婦之所能知能行直至聖人天地之不能盡皆是說費處而所謂隱者不離於此也。語錄曰費是道之用隱是道之所以然而不可見處蓋可知可能者道中之一

事

陳氏曰是就日用間一二事論如事親事長之類

及其至而聖人不知不

能則舉全體而言聖人固有所不能盡也

語錄曰人多以至為

道之精妙處若是道之精妙有所不知不能便與庸人無異何足為聖人這至只是道之盡處所不知所不能是沒緊要底事他大本大根元無欠闕只是古今事變禮樂制度便也須學。又曰聖人不能知不

能行者非至妙處聖人不能知而不能行天地間固有不緊要底事聖人不能盡知緊要底則聖人能知之能行之若至妙處聖人不能知不能行粗處却能之非聖人乃凡人也。又曰道無不包若盡論之聖人豈能纖悉盡知 侯氏曰聖人所不知如孔子問禮問官之

類所不能如孔子不得位堯舜病博施之類

文集曰侯氏之

說是非全體中之不能者。語錄曰問侯氏止尋得一二事元不曾說著及其至也之意此是聖人看得徹底故於此理亦有未肯自居處曰夫婦之與知能行是萬分中有一分聖人不知不能是萬分中欠得一分。問以孔子不得位為聖人所不能祿位名壽此在天者聖人如何能必得曰中庸明說大德必得其位孔子有大德而不能 愚謂人所憾於天地如覆載得其位如何不是不能

生成之偏及寒暑災祥之不得其正者

文集曰問所憾恐非謂天

能生覆而不能形載地能形載而不能生覆恐只在於陰陽寒暑之或乖其常吉凶災祥之或失其宜品類之枯敗夭折而不得遂其理此雖天地不能無憾人固不能無憾此也曰既是不可必望其全便是有未足處

詩云鳶飛戾天魚躍于淵言其上下察也

薦余專反

詩大雅旱麓之篇鳶鳴類戾至也察著也

文集曰察者昭著之

義言道體之流行發見昭著如此也。語錄曰察非審察之察如天地明察之察

子思引此詩

以明化育流行上下昭著莫非此理之用所謂費也

然其所以然者則非見聞所及所謂隱也

語錄曰爲飛魚躍上

下昭著莫非至理但又視之不見聽之不聞將出來不得須是於此自有所見。又曰如薦飛亦是費魚躍亦是費而所以爲費者試討箇物來看。又曰薦飛魚躍費也必有一箇什麼物使得如此此便是隱。三山陳氏曰天地之間有一物必有一理有所謂已然者必有所謂所以然者爲則天而不能淵魚則淵而不能天此其用也已然者也是必有所謂所以然者以爲之體然體之隱初不離於用之顯也

故程子曰此一節子思喫緊爲人處活潑潑地

語錄曰活

只是不滯於一隅。永嘉陳氏曰大要不要人去昏嘿窟冥中求道理處處平平會得時多少分明快活讀者其致思焉

君子之道造端乎夫婦及其至也察乎天地

結上文

右第十二章子思之言蓋以申明首章道不可離之意也其下八章雜引孔子之言以明之

或問十二章之說曰道之用廣而其體則微密而不可見所謂費而隱也即其近而言之男女居室人道之常雖愚不肖亦能知而行之極其遠而言

之則天下之大事物之多聖人亦容有不盡知盡

能者也

永嘉陳氏曰自其明白坦蕩者言之則雖夫婦之愚不肖皆可得而知可得而行自

其纖悉極至者言之雖聖人有所不能盡知不能盡行

然非獨聖人有所不

知不能也天能生覆而不能形載地能形載而不

能生覆至於氣化流行則陰陽寒暑吉凶災祥不

能盡得其正者尤多此所以雖以天地之大而

人猶有憾也

或曰夫既謂之聖人矣尚何不知不能之有三山陳氏曰天地之大也尚

有所憾焉况聖人乎水旱螟蝗祁寒暑雨人將怨咨又不能使物物皆得其所故是有憾已舉此以

明聖人之所不能者也。夫自夫婦之愚不肖所能知行至

於聖人天地之所不能盡道蓋無所不在也。

陳氏曰自

夫婦之與知能行處道固無所不在及聖人之所不能知不能行處而道亦無所不在至於天地之大猶有所憾處而道亦無所不在。故君子之語道也其大至於天

地聖人之所不能盡而道無不包則天下莫能載矣其小至於愚夫愚婦之所能知能行而道無不體則天下莫能破矣道之在天下其用之廣如此可謂費矣而其所用之體則不離乎此而有非視

聽之所及者此所以為費而隱也

黃氏曰道之見於用者費也其

所以為是用者隱也費猶木之有枝葉可見者隱猶木之有根本不可見者也。永嘉陳氏曰語其大而天下莫能載語其小而天下莫能破凡此是說道之費處其體之隱則在其中矣故不言隱非於費之外別有所謂隱也使別有隱可見有隱可言則非體用一源顯微無間已不足為道矣子思之言至此極矣然猶以為不足以盡其意也故

又引詩以明之曰鳶飛戾天魚躍于淵所以言道

之體用上下昭著而無所不在也

陳氏曰道之體用甚昭朗流動

充滿上下之間無所不在造端乎夫婦極其近小而言也察乎天

地極其遠大而言也

文集曰君子之道造端乎夫婦之微密而語其極則察乎

天地之高深。三山陳氏曰造端乎夫婦其道甚近而小也然要其極以至於遠且大則凡昭然天地之間者莫非其理之不可掩蓋夫婦之際隱微之間尤見道之

不可離處知其造端乎此則其所以戒謹恐懼之

實無不至矣

文集曰幽闇之中衽席之上人或褻而慢之則天命有所不行矣易

首乾坤而重咸恒詩首關雎而戒淫佚書記釐降

禮謹大昏皆此意也。曰諸說如何曰程子至矣

張子以聖人為夷惠之徒既已失之

案張子曰聖人若夷惠之

徒亦未知君子之道若知
君子之道亦不入於偏

又曰君子之道達諸天

故聖人有所不知夫婦之智淆諸物故聖人有所

不與

案此皆張
子全語

則又析其所不知不能而兩之皆

不可曉也已曰諸家皆以夫婦之能知能行者為

道之費聖人之所不知不能而天地有憾者為道

之隱其於文義協矣若從程子之說則使章內專

言費而不及隱恐其有未安也曰謂不知不能為

隱似矣若天地有憾鳶飛魚躍察乎天地而欲亦

謂之隱則恐未然且隱之為言正以其非言語指陳之可及耳故獨舉費而隱常默具乎其中若於費外別有隱而可言則已不得為隱矣程子之

云又何疑耶

三山陳氏曰先儒有以聖人所不知不能語大語小者明其為隱矣繹其

義反諸理而不安也夫所謂隱者而聖人不知不能則聖人亦不足貴矣謂小而莫能破者為隱則小之為義非要妙之謂也曰費而隱者費中有隱非費之外別有隱者也○曰然則程

子所謂鳶飛魚躍子思喫緊為人處與必有事焉而勿正心之意同活潑潑地者何也曰道之流行

發見於天地之間無所不在在上則鳶之飛而戾
于天者此也在下則魚之躍而出于淵者此也其
在人則日用之間人倫之際夫婦之所知所能而
聖人之所不知不能者亦此也此其流行發見於
上下之間者可謂著矣子思於此指而言之惟欲
學者於此默而識之則為有以洞見道體之妙而
無疑而程子以為子思喫緊為人處者正以示人
之意為真切於此也

文集曰喫緊為人處是要人
就此瞥地便見得箇天理全

體

其曰與必有事焉而勿正心之意同活潑潑地則又以明道之體用流行發見充塞天地亘古亘今雖未嘗有一毫之空闕一息之間斷然其在人而見諸日用之間者則初不外乎此心故必此心之存而後有以自覺也

文集曰必有事焉而勿正心者乃指此心之存主處

活潑潑地者方是形容天理流行無所滯礙之妙盖以道之體用流行發見雖無間息然在人而見諸日用者初不外乎此心故必此心之存然後方見其全體呈露妙用顯行活潑潑地略無滯礙耳若見得破則即此須臾之頃此體便已洞然。黃氏曰看中庸到此一章若無所見則亦不足以為道

矣充塞天地間無非是理無一毫空闕無一
息間斷是非拘牽文義者之所能識也必有

事焉而勿正心活潑潑地亦曰此心之存而全體
呈露妙用顯行無所滯礙云爾非必仰而視乎鳶
之飛俯而觀乎魚之躍然後可以得之也抑孟子
此言固為精密然但為學者集義養氣而發耳至
於程子借以為言則又以發明學者洞見道體之
妙非但如孟子之意而已也
文集曰程子借孟子
之語發明已意說不

到處後人却
作實語看了

蓋此一言雖若二事然其實則必有

事焉半詞之間已盡其意善用力者苟能於此超然默會則道體之妙已躍如矣何待下句而後足於言耶聖賢特恐學者用力之過而反為所累故更以下句解之欲其雖有所事而不為所累耳非謂必有事焉之外又當別設此念以為正心之防也

永嘉陳氏曰今世做工夫人心却不曾放去又多失於迫切不做工夫人心裏自在又却都沒

一事曰然則其所謂活潑潑地者毋乃釋氏之遺意

耶曰此但俚俗之常談釋氏蓋嘗言之而吾亦言

之耳彼固不得而專之也况吾之所言雖與彼同而所形容實與彼異若出於吾之所謂則夫道之體用固無不在然鳶而必戾于天魚而必躍于淵是君君臣臣父父子子各止其所而不可亂也若如釋氏之云則鳶可以躍淵而魚可以戾天矣是

安可同日而語哉

語錄曰問引君臣父子為言此吾儒之所以異於佛者如何曰

鳶飛魚躍只是言其發見耳釋亦言發見但渠言發見却一切混亂至吾儒須辨其定分君臣父子皆定分也鳶必戾于天魚必躍于淵且子思以夫婦言之所以明人

事之至近而天理在焉釋氏則舉此而絕之矣又安可同年而語哉。曰呂氏以下如何曰呂氏分此以上論中以下論庸又謂費則常道隱則至道恐皆未安

案呂氏曰此以上論中此以下論庸此章言常道之終始費則常道隱則至道

惟能盡常道乃所以為至道謝氏既曰非是極其上下而言矣

又曰非指鳶魚而言蓋曰子思之引此詩姑借二物以明道體無所不在之實非以是為窮其上下之極而形其無所不包之量也又非以是二物專

為形其無所不在之體而欲學者之必觀乎此也
此其發明程子之意蓋有非一時同門之士所得
聞者而又別以夫子與點之意明之則其為說益
以精矣但所謂察見天理者恐非本文之訓而於
程子之意亦未免小失之耳

案謝氏曰為飛戾天
魚躍于淵非是極其

上下而言蓋真箇見得如此此正是子思喫緊道
與人處若從此解悟便可入堯舜氣象○又曰為
飛戾天魚躍于淵無此私意上下察以明道體無
所不在非指為魚而言也若指為魚言則上而更
有天下面更有地在知勿忘勿助長則知此知此
則知夫子與點之意○又曰詩云為飛戾天魚躍

于淵猶韓愈所謂魚川泳而鳥雲飛上下自然各得其所也子思之意言上下察猶孟子所謂必有事焉而勿正察見天理不用私意也

游氏之說其不可曉者尤多如

以良知良能之所自出為道之費則良知良能者不得為道而在道之外矣又以不可知不可能者為道之隱則所謂道者乃無用之長物而人亦無所賴於道矣所引天地明察似於彼此文意兩皆失之至於所謂七聖皆迷之地則莊生邪遁荒唐之語尤非所以論中庸也

案游氏曰唯費也則良知良能所自出故夫婦

之愚不肖可以與知而能行焉惟隱也則非有思者所可知非有為者所可能故聖人有所不知不能焉蓋聖人者德之成而業之大也過此以往則神矣無方也不可無體也不可能此七聖皆迷之地也孝經曰事父孝故事天明事母孝故事地察蓋事父母之心雖夫婦之愚不肖亦與有焉及其至也天地明察神明彰矣則雖聖人之德又何加以此此中庸所以為至也○語錄曰游氏有七聖皆迷之說設如把至作精妙說則下文語大語小便如何分

楊氏以大而化之
非智力所及為聖人不知不能以祁寒暑雨雖天地不能易其節為道之不可能而人所以有憾於天地則於文義既有所不通而又曰人雖有憾而

道固自若則其失愈遠矣其曰非體物而不遺者

其孰能察之其用體字察字又皆非經文之正意

也

案楊氏曰自可欲之善至於充實輝光之大致知力行之積也大而化之至於不可知之神則

非知力所及也德盛仁熟而自至焉耳故及其至也聖人有所不知不能焉。又曰和寒暑雨之變其機自爾雖天地之大不能易其節也夫道之不可能也如是而入雖猶有憾焉道固自若也。又曰鳶飛魚躍非夫體物而不遺者其孰能察之

大抵此章若從諸家以聖

人所不知不能為隱則其為說之弊必至於此而

後已嘗試循其說而體驗之若有以使人神識飛

揚眩瞽迷惑而無所底止子思之意其不出此也
必矣唯侯氏不知不能之說最為明白但所引聖
而不可知者孟子本謂人所不能測耳非此文之
意也其他又有大不可曉者亦不足深論也
案侯氏曰
所不能者如聖而不可知之神

子曰道不遠人之為道而遠人不可以為道

道者率性而已固衆人之所能知能行者也故常不

遠於人

黃氏曰率性之謂道道何嘗遠人此人字兼人已而言乃一章之綱領也自己觀之已便

具此道自人觀若為道者厭其卑近以為不足為而

反務為高遠難行之事則非所以為道矣

黃氏曰此指為道之

人已身而言己之身便具此道又豈可遠此身以為道

詩云伐柯伐柯其則不遠執柯以伐柯睨而視之猶以

為遠故君子以人治人改而止

睨研計反

詩豳風伐柯之篇柯斧柄則法也睨邪視也言人執

柯伐木以為柯者彼柯長短之法在此柯耳

語錄曰執柯以

伐柯不用更別去討法則只你那手中所執者便是則

然猶有彼此之別故伐

者視之猶以為遠也

葉氏曰晚視所伐之柯猶見其未施工治與所執之柯未為一

體則是猶有付量之意

若以人治人則所以為人之道各在當

人之身初無彼此之別

語錄曰若此箇道理人人具有纔要做底便是初無彼此

之別放去收回只在這些子間何用別處討○三山陳氏曰以身為道道即在身其近不正於以此柯視彼柯也特人自不察耳故君子之治人也即以其人之道還治

其人之身其人能改即止不治蓋責之以其所能知

能行非欲其遠人以為道也

語錄曰未改以前是失却人道既改便是復得

人道了更何用治他○又曰人人本自有許多道理只是不曾依得這道理却做從不是道理處去今欲

治之不具將他人底道理去治他又不是分我底道理與他他本有此道理我但因其自有者還以治之而已○黃氏曰此指已所治之人乃指他人而言人之身亦具此道故但以人所具之道還以導之能改則止亦不可外人以求道○又曰人即道也以彼之道治彼之身能改其不善則本人之身還得本人之道矣又安得不止而尚他求哉○陳氏曰君子之治人只就本人身上當然道理還治本人之身初無彼此之別也及其人能改了便止如此則不以高遠難行底去責他他只把他能知能行底去治他

張

子所謂以衆人望人則易從是也

語錄曰道者衆人之道衆人所能知

能行者今人自做未得衆人耳此衆人不是說不好底人○永嘉陳氏曰衆人之說即天生蒸民凡厥庶民之謂亦是將他共有道理治他乃天理人倫之類若以蠢蠢昏昏爲衆人非聖人意

忠恕違道不遠施諸己而不願亦勿施於人

盡己之心為忠

語錄曰忠者盡己之心無少偽妄。又曰只是盡自家之心不要有一毫

不盡。又曰須是十分盡得方始是盡若七分盡得三分未盡也是不忠。陳氏曰忠是就心說是盡已

之心無不真實者

推己及人為恕

語錄曰恕者推己及物各得所欲。又曰知得我是

要恁地想人亦要恁地而今不可不教他恁地三反五折便是推己及物。陳氏曰恕是就待人接物處說只是推己心之所真實者以及人物而已。又曰推己心以及人要如己心之所欲便是恕

違去

也如春秋傳齊師違穀七里之違言自此至彼相去不遠非背而去之之謂也道即其不遠人者是也施

諸已而不願亦勿施於人忠恕之事也

語錄曰問此只是恕何故

將作忠恕說曰忠恕兩箇離不得方忠時未見得恕及至恕時忠行乎其間施諸已而不願亦勿施諸人非忠者以己之心度人之心未嘗不同則道之不遠不能也

於人者可見故己之所不欲則勿以施之於人亦不

遠人以為道之事

黃氏曰此即己之身而得待人之道待人之道不必遠求觀其施於

已者張子所謂以愛己之心愛人則盡仁是也

語錄曰凡

人責人處急責已處緩愛已則急愛人則緩若拽轉頭來便自道理流行。永嘉陳氏曰此因恕而言仁耳恕是求仁之事推愛己之心以愛人恕者之事也以愛己之心愛人仁者之事也忠恕達道不遠轉一

過即仁矣故
張子以仁言

君子之道四丘未能一焉所求乎子以事父未能也所
求乎臣以事君未能也所求乎弟以事兄未能也所求
乎朋友先施之未能也庸德之行庸言之謹有所不足
不敢不勉有餘不敢盡言顧行行顧言君子胡不慥慥

爾

子臣弟友
四字絕句

求猶責也道不遠人凡己之所以責人者皆道之所
當然也故反之以自責而自修焉

黃氏曰此即人之
身而得治己之道

治己之道初不難見庸平常也行者踐其實謹者擇

其可

陳氏曰雖平常之行亦必踐其實平常之言亦必致其謹

德不足而勉則行

益力言有餘而訥則謹益至謹之至則言顧行矣行

之力則行顧言矣

三山陳氏曰人之言常有餘於行而

行則言之有餘者將自損行而顧其言則行之不足者將自勉矣

慥慥篤實貌

愚謂篤實

者篤厚而真實也

言君子之言行如此豈不慥慥乎贊美之

也凡此皆不遠人以為道之事

三山陳氏曰此一章起於道不遠人至此

而畢語若雜出而意脈貫通反復於人已之間者詳盡明切而有序其歸不過致謹於言行以盡其實耳

苟繹思而從事焉則其於處人已之道兩盡而無間矣

張子所謂以責人之心

責己則盡道是也

愚謂我之所望於人者即我所當自盡之則不是將他人道理來治

我蓋以得於天之所同然者而自治其身爾

右第十三章

道不遠人者夫婦所能立未能一者聖人所不

能

或疑四者乃聖人切身事如前所援堯舜病博施之類則聖人有不能處若此四者豈真

有所不能耶永嘉陳氏曰只此四者纔處得恰好皆未能盡道前章說聖人不能即謂此類如博施濟衆豈真不能耶或百中遺一或千中遺一亦聖人所病也豈是都做不得

皆費

也而之所以然者則至隱存焉

輔氏曰即人之所行言之故但

及其費而隱自存

下章放此

或問十三章之說子以為以人治人為以彼人之道還治彼人善矣又謂責其所能知能行而引張子之說以實之則無乃流於姑息之論而所謂人之道者不得為道之全也耶曰上章固言之矣夫婦之所能知能行者道也聖人之所不知不能而天地猶有憾者亦道也然自人而言則夫婦之所

能知能行者人之所切於身而不可須臾離者也
至於天地聖人所不能及則其求之當有漸次而
或非日用之所急矣然則責人而先其切於身之
不可離者後其有漸而不急者是乃行遠自邇升
高自卑之序使其由是而不已焉則人道之全亦
將可以馴致今必以是為姑息而遽欲盡道以責
於人吾見其失先後之序違緩急之宜人之受責
者將至於有所不堪而道之無窮則終非一人一

日之所能盡也是亦兩失之而已焉爾。曰子臣
弟友之絕句何也曰夫子之意蓋曰我之所責乎
子之事已者如此而反求乎已之所以事父則未
能如此也所責乎臣之事已者如此而反求乎已
之所以事君則未能如此也所責乎弟之事已者
如此而反求乎已之所以事兄則未能如此也所
責乎朋友之施已者如此而反求乎已之所以先
施於彼者則未能如此也於是以其所以責彼者

自責於庸言庸行之間蓋不待求之於他而吾之

所以自修之則具於此矣

語錄曰常人責子必欲其孝於我然不知我之

所以事父者曾孝否以我責子之心而反推已之
所以事父此便是則也常人責臣必欲其忠於我
然不知我之事君者盡忠否以我責臣之心而反
之於我則其則在此矣。黃氏曰或以所求于臣
一句而有疑非也古人君臣字多通用諸侯大夫
有土者皆稱君其下皆稱臣凡卑之於尊僕隸之
於主便有臣義今或不得其讀而以父君兄之四字為絕

句則於文意有所不通而其義亦何所當哉

文集曰此

處主意立文與大學繫矩一章相似人多誤讀。
葉氏曰舊讀是以恕已之心恕人今讀是以責人

之心責已若如舊說當云所求乎子以事父以
字全是起句意義一讀之間直繫利害如此○

曰諸說如何曰諸家說論語者多引此章以明一
以貫之義說此章者又引論語以釋違道不遠
之意一矛一盾終不相謀而牽合不置學者蓋深
病之及深考乎程子之言有所謂動以天者然後
知二者之為忠恕其迹雖同而所以為忠恕者其
心實異非其知德之深知言之至其孰能判然如
此而無疑哉然盡已推己乃忠恕之所以名而正

為此章違道不遠之事若動以天而一以貫之則
不待盡已而至誠者自無息不待推已而萬物已
各得其所矣曾子之言蓋指其不可名之妙而借
其可名之粗以明之學者默識於言意之表則亦
足以互相發明而不害其為同也餘說雖多大槩
放此推此意以觀之則其為得失自可見矣

朱程
子曰

以已及物忠也推已及物恕也違道不遠是也忠
恕一以貫之忠者天道恕者人道忠者無妄恕者
所以行乎忠也忠者體恕者用大本違道也此與
違道不遠異者動以天爾○語錄曰論著忠恕名

義自合依子思忠恕達道不遠是也。曾子所說却是移上一階說聖人之忠恕。到程子又移上一階說天地之忠恕其實只一箇忠恕。須自看教有許多等級分明。○又曰曾子忠恕與子思忠恕不同。曾子忠恕是天子思忠恕尚是人在。○黃氏曰今且把達道不遠之忠恕來看便分曉。聖人之忠恕天道也。學者便是人道也。如何又說忠是天道恕是人道。以聖人去比學者。聖人之忠是天之天聖人之恕是天之人。學人之忠是人之人。天學者之忠是人之人。天學者之恕是人之人。畢竟忠喚做體便是近。那未發處故雖學者亦有箇天恕喚做用便是推出外去了。雖聖人亦有箇人忠只是盡自家心便較易。恕是逐一去做便著力。○輔氏曰達道不遠者學者之忠恕也。動以天者聖人之忠恕也。曾子一貫之忠恕雖借學者之事而言其所以異者只是動以天爾。所謂動以天爾者蓋於忠上已全盡了不待推而自

然及物也如所謂以已及物仁也此則夫子之一貫所謂動以天也。陳氏曰中庸說忠恕違道不遠正是說學者之忠恕曾子說夫子之道忠恕乃是說聖人之忠恕聖人忠恕是天道學者忠恕是

人違道不遠如齊師違穀七里之違非背而去之

之謂愚固已言之矣諸說於此多所未合則不察文義而強為之說之過也夫齊師違穀七里而穀人不知則非昔已在穀而今始去之也蓋曰自此而去以至於穀纔七里耳孟子所云夜氣不足以存則其違禽獸不遠矣非謂昔本禽獸而今始違

之也亦曰自此而去以入於禽獸不遠耳蓋所謂
道者當然之理而已根於人心而見諸行事不待
勉而能也然唯盡己之心而推以及人可以得其
當然之實而施無不當不然則求之愈遠而愈不
近矣此所以自是忠恕而往以至於道獨為不遠
其曰違者非背而去之之謂也

三山陳氏曰違非背違之違乃相去

之義猶言某去某云爾

程子又謂事上之道莫若忠待下之

道莫若恕

案此乃程子全語

此則不可曉者若姑以所重

言之則似亦不為無理若究其極則忠之與恕初

不相離程子所謂要除一个除不得

案程子曰忠恕兩字要除

一箇除不得

而謝氏以為猶形影者

案謝氏曰忠恕猶形影也無忠做恕

不出

意可見矣今析為二事而兩用之則是果有

無恕之忠無忠之恕而所以事上接下者皆出於

強為而不由乎中矣豈忠恕之謂哉是於程子他

說殊不相似意其記錄之或誤不然則一時有為

言之而非正為忠恕發也

語錄曰忠恕只是一件事不可作兩箇看○又

曰忠與恕不可相離一步。○陳氏曰大槩忠恕只是一物就中截作兩片則為二物蓋存諸中者既忠則發出外來便是恕應事接物處不恕則是在我者必不十分真實故發出忠底心便是恕底事做成恕底事張子二說皆深得之

案張子曰所求乎君子之道四

是實未能道何嘗有盡聖人人也人則有限是誠不能盡能也聖人之心則直欲盡道事則安能得盡如博施濟眾堯舜實病諸堯舜之心其施直欲至于無窮方為博施然安得若是修己以安百姓是亦堯舜實病之欲得人人如此然安得如

但虛

者仁之原忠恕與仁俱生之語若未瑩耳

案張子曰虛者

仁之原忠恕者與仁俱生義禮者仁之

呂氏改本太略不盡經意舊

本乃推張子之言而詳實有味但柯猶在外以下

為未盡

案呂氏曰妙道精義常存乎君臣父子夫婦朋友之間不離乎交際酬酢應對之末

皆人心之所同然未有不出於天者也若絕乎人倫外乎世務窮其所不可知議其所不可及則有天人之分內外之別非所謂大而無外一以貫之安在其為道也歟執斧之柄而求柯於木其尺度之則固不遠矣然柯猶在外睨而視之始得其則若夫治已治人之道於已取之不必睨視之勞而自得於此矣故君子推是心也其治衆人也以衆人之道而已以衆人之所知責其所知以衆人之能行責其所行改而後止不厚望也其愛人也以忠恕而已忠者誠有是心而不自欺恕者推待已之心以及人者也忠恕不可謂之道而道非忠恕不行此所以言違道不遠者其治已也以求乎人

者反於吾身事父事君事兄先施之朋友皆衆人之所能盡人倫之至則雖聖人亦自謂未能此舜所以盡事親之道必至替瞍底豫者也庸者常道也事父孝事君忠事兄弟交朋友信庸德也必行而已有問有答有倡有和不越乎此者庸言也無易而已不足而不勉則德有止而不進有餘而盡之則道難繼而不行無是行也不敢苟言以自欺故言顧行有是言也不敢不行而自棄故行顧言若易之曰所謂則者猶在所執之柯而不在所伐之柯故執柯者必有睨視之勞而猶以為遠也若夫以人治人則異於是蓋衆人之道止在衆人之身若以其所及知者責其知以其所能行者責其

行人改即止不厚望焉則不必睨視之勞而所以
治之之則不遠於彼而得之矣忠者誠有是心而
不自欺也恕者推待己之心以及人也推其誠心
以及於人則其所以愛人之道不遠於我而得之
矣至於事父事君事兄交友皆以所求乎人者責
乎己之所未能則其所以治己之道亦不遠於心
而得之矣夫四者固皆衆人之所能而聖人乃自
謂未能者亦曰未能如其所以責人者耳此見聖

人之心純亦不已而道之體用其大天下莫能載其小天下莫能破舜之所以盡事親之道必至于瞽瞍底豫者蓋為此也如此然後屬乎庸者常道之云則庶乎其無病矣且其曰有餘而盡之則道難繼而不行又不若游氏所引恥躬不逮為得其

文意也

案游氏曰有所不足不敢不勉將以踐言也則其行顧言矣有餘不敢盡恥躬之不逮也則其言顧行矣

謝氏侯氏所論論語之忠恕獨得程子

之意

案謝氏曰以天地之理觀之忠譬如流而不息恕譬如萬物散殊知此則可以知一貫之

理矣。○侯氏曰：忠恕一也，性分不同。夫子聖人也，故不待推。

但程子所謂天地

之不起，亦曰天地之化生生不窮，特以氣機闔闢有通有塞，故當其通也，天地變化草木蕃，則有似於恕；當其塞也，天地閉而賢人隱，則有似於不起。耳其曰不起，非若人之閉於私欲而實有被害之心也。謝氏推明其說，乃謂天地之有不起，乃因人而然，則其說有未究者。蓋若以為人不致中，則天地有時而不位，人不致和，則萬物有時而不育，是

謂天地之氣因人之不恕而有似於不恕則可若
曰天地因人之不恕而實有不恕之心則是彼為
人者既以岐心失恕而自絕於天矣為天地者反

效其所為以自己其於穆之命也豈不誤哉

案謝氏舉

程子曰天地變化草木蕃是天地之恕天地閉賢
人隱是天地之不恕或言天地何故亦有不恕曰
天地因人者也若不因人何故人能與天
地為一故有意必固我則與天地不相似

游氏之

說其病尤多至謂道無物我之間而忠恕將以至
於忘己忘物則為己違道而猶未遠也是則老莊

之遺意而遠人甚矣豈中庸之旨哉

案游氏曰夫道一以貫之

無物我之間也既曰忠恕則已違道矣然忠以盡已則將以至忘己也恕以盡物則將以至忘物也則善為道者莫近焉故雖遠而不遠矣

楊氏又謂以人為道則與道

二而遠於道故戒人不可以為道如執柯以伐柯則與柯二故睨而視之猶以為遠則其違經背理又有甚焉使經而曰人而為道則遠人故君子不可以為道則其說信矣今經文如此而其說乃如彼既於文義有所不通而推其意又將使道為無

用之物人無入道之門而聖人之教人以為道者
反為誤人而有害於道是安有此理哉既又曰自
道言之則不可為自求仁言之則忠恕者莫近焉
則已自知其有所不通而復為是說以救之然終
亦矛盾而無所合是皆流於異端之說不但毫釐
之差而已也

案楊氏曰仁者人也合而言之道也
道宜嘗離人哉人而為道與道二矣

道之所以遠執柯以伐柯與柯二矣為道之譬也
睨而視之猶以為遠為道而遠人之譬也執柯以
伐柯其取譬可謂近矣睨而視之猶且以為遠况
不能以近取譬乎則其違道可知矣故君子以人

治人改而止以人治人仁之也改而止不為已甚也蓋道一而已仁是也視天下無一物之非仁則道其在是矣然則道終不可為乎曰自道言之則執柯伐柯猶以為遠也自求仁言之則唯忠恕莫近焉故又言之以示進為之方庶乎學者可與入德矣

侯氏固多疎闊其引

顏子樂道之說愚於論語已辨之矣

案侯氏曰為道如言顏子

樂道

至於四者未能之說獨以為若止謂恕已以

及人則是聖人將使天下皆無父子君臣矣此則

諸家皆所不及

案侯氏曰父子之仁天性也君臣之義也兄弟亦仁也朋友亦義也

孔子自謂皆未能何也只謂恕已以及人則聖人將使天下皆無父子無君臣乎蓋以責人之心責

已則盡道也

蓋近世果有不得其讀而輒為之說曰此君子以一己之難克而知天下皆可恕之人也嗚呼此非所謂將使天下皆無父子君臣者乎侯氏之言於是乎驗矣

君子素其位而行不願乎其外

素猶見在也言君子但因見在所居之位而為其所當為無慕乎其外之心也

三山陳氏曰因其見在所居之位而行之其在外者

非所願也

素富貴行乎富貴素貧賤行乎貧賤素夷狄行乎夷狄

素患難行乎患難君子無入而不自得焉

難去聲

此言素其位而行也

陳氏曰素富貴行乎富貴如舜之被袵鼓琴是也素貧賤行乎

貧賤如舜之飯糗茹草若將終身是也素夷狄行乎夷狄如孔子欲居九夷曰君子居之何陋之有是也素患難行乎患難如孔子曰天之未喪斯文也匡人其如予何是也蓋君子無所往而不自得惟為吾之所當為而已此說素其位而行之意

在上位不陵下在下位不援上正己而不求於人則無

怨上不怨天下不尤人

援平聲

此言不願乎其外也

陳氏曰吾居上位則不陵忽乎下吾居下位則不攀援於上惟

反自責於已初無求取於人之心自然無怨蓋有大責望於天而天不副所望則必怨天有求取於人而人不我應則必歸罪於人聖人無責望於天之心無求取於人之意又何怨尤之有此處見聖人胸中多少灑落明瑩真如光風霽月無一點私累此說不願乎其外之意

故君子居易以俟命小人行險以徼幸

易去聲

易平地也居易素位而行也俟命不願乎外也

愚謂君子

胸中甚平易所居者安素位而行也富貴貧賤惟聽於天之所命不願乎外也

徼求也幸謂

所不當得而得者

語錄曰行險徼倖本是連上文不願乎其外說言強生意智取所不

當得

子曰射有似乎君子失諸正鵠反求諸其身

正音征鵠
工毒反

畫布曰正棲皮曰鵠皆侯之中射之的也

詩傳曰侯
張布而射

之者也正設的於侯中而射之者也大射則張皮侯而設鵠賓射則張布侯而設正

子思引此

孔子之言以結上文之意

陳氏曰如射法之有不中只是自責恐我步法之或

不正手法之或不端所致曾不責之他人此以證君子以求諸己不願乎其外之意

右第十四章

子思之言也凡章首無子曰字者放此

或問十四章之說曰此章文義無可疑者而張子

所謂當知無天下國家皆非之理者尤為切至

案張

子曰責己者當知無天下國家皆非之理故學至於不尤人學之至也

呂氏說雖不

免時有小失然其大體則皆平正懇實而有餘味

也

案呂氏曰達則兼善天下得志則澤加於民素富貴行乎富貴也不驕不淫不足以道之也窮

則獨善其身不得志則修身見於世素貧賤行乎貧賤者也不諂不憚不足以道之也言忠信行篤敬雖蠻貊之邦行矣素夷狄行乎夷狄者也文王內文明而外柔順以蒙大難箕子內難而能正其志素患難行乎患難者也愛人不親反其仁治人不治反其智此在上位所以不陵下也復以其富

我以吾仁彼以其爵我以吾義吾何慊乎哉此在下位所以不援上也陵下不從則罪其下援上不得則非其上是所謂尤人者也庸德之行庸言之謹居易者也國有道不變塞焉國無道至死不變心遠日休行其所無事如子從父命無所往而不受俟命者也若夫行險以徼一旦之幸得之則貪爲已力不得則不能反躬是所謂怨天者也故君子正己而不求於人如射而已射之不中由吾巧之不至也故失諸正鵠者未有不反求諸身如君子之治己行有不得亦反求諸身則德之不進豈吾憂哉

游氏說亦條暢而存亡得喪窮通好醜之說尤善

案游氏曰素其位而行者即其位而道行乎其中若其素然也舜之飯糗茹草若將終身此非素貧賤而道行乎貧賤不能然也及其爲天子被袵衣鼓琴若固有之此非素富貴而道行乎富貴不能

然也飯糗糝衣其位雖不同而此道之行一也至於夷狄患難亦若此而已道無不行則無入而不自得矣蓋道之在天下不以易世而有存亡故無古今則君子之行道不以易地而有加損故無得喪至於在上位不陵下知富貴之非泰也在下位不援上知貧賤之非約也此惟正已而不求於人者能之故能上不怨天下不尤人蓋君子為能循理故居易以俟命居易未必不得也故窮通皆好小人反是故行險以徼幸行險未必常得也故窮通皆醜學者要當篤信而已但楊氏以

反身而誠為不願乎外則本文之意初未及此而詭遇得禽亦非行險徼幸之謂也

案楊氏曰君子居其位若固有

之無出位之思素其位也萬物皆備於我反身而誠樂莫大焉何願乎外之有哉能素其

位而行無入而不自得也居易以俟命行其所無事也行險以徵幸不受命者也詭遇而得禽者蓋有焉君子不為也射有似乎君子者射以容節比於禮樂為善內志正外體直然後持弓矢審固持弓矢審固然後可以言中射而失正鵠者未能審固也知射者豈他求哉反而求諸身以正吾志而已此君子居易之道也世之行險以徵幸者一有失焉益思所以詭遇也

則異於是矣

侯氏所辨常總默識自得之說

甚當近世佛者妄以吾言傳著其說而指意

乖刺如此類者多矣甚可笑也

案常總嘗問二士人曰論

語云默而識之識是識箇甚子思言君子無入不自得得是得箇甚或者無以對侯

氏曰是不識吾儒之道猶以吾儒語為釋氏用在
吾儒為不成說話既曰默識與無入不自得更理
會甚識甚得之事是不成說話也今人見筆墨須
謂之筆墨見人須謂之人不須問默而識之是默
識也聖賢於道猶是也庸言之信庸行之謹
謹是自得也豈可名為所得所識之事乎但侯
氏所以自為說者却有未善若曰識者知其理之
如此而已得者無所不足於吾心而已則豈不明
白真實而足以服其心乎

君子之道辟如行遠必自邇辟如登高必自卑

辟譬
同

詩曰妻子好合如鼓瑟琴兄弟既翕和樂且耽宜爾室

家樂爾妻帑

好去聲耽詩作湛亦音耽樂音洛

詩小雅常棣之篇鼓瑟琴和也翕亦合也耽亦樂也

帑子孫也

子曰父母其順矣乎

夫子誦此詩而贊之曰人能_レ和於妻子_レ宜於兄弟_レ如此則父母其安樂之矣子思引詩及此語以明行遠自邇登高自卑之意

右第十五章

或問十五章之說曰章首二句承上章而言道雖無所不在而其進之則有序也其下引詩與夫子之言乃指一事以明之非以二句之義為止於此也諸說唯呂氏為詳實然亦不察此而反以章首二言發明引詩之意則失之矣

案呂氏曰不得乎親不可以為人不

順乎親不可以為子故君子之道莫大乎孝孝之本莫大乎順父母故仁人孝子欲順乎親必先乎妻子不失其好兄弟不失其和室家宜之妻帑樂之致家道成然後可以養父母之志而無違行遠登高者謂孝莫大乎順其親者也自適自卑者謂本乎妻子兄弟者也故身不行道不行於妻子文

王刑于寡妻至於兄弟則治家之道必自妻子始
○三山陳氏曰行遠自邇登高自卑凡君子之道
其推行之序皆然中庸舉詩以明之特指一事而
言耳或者以行遠登高辟順父母以自邇自卑
和妻子則泥矣

子曰鬼神之為德其盛矣乎

程子曰鬼神天地之功用

語錄曰功用兼精粗而言
天地是體鬼神是用○又

曰功用只是論發見者○又曰如寒來暑往日
往月來春生夏長秋收冬藏皆鬼神之功用

而造

化之迹也

語錄曰鬼神是天地間造化只箇二氣屈
伸往來神屬陽鬼屬陰往者屈來者伸便

有箇迹迹地○又曰雨風露雷日月晝夜此鬼神之
迹也此是白日公平正直之鬼神若所謂有嘯于梁

觸吾躬此其所謂不正邪暗或有或無或去或來或聚或散者又有所謂禱之而應祈之而獲此亦所謂鬼神同一理也世間萬事皆此理但精粗小大之不同耳。陳氏曰造化之迹以陰陽流行著見於天地者言

張子曰鬼神者二氣之良能也

語錄曰是說往來屈伸乃理之

自然非有安排措置。又曰二氣即陰陽也良能是其靈處

愚謂以二氣言則鬼

者陰之靈也神者陽之靈也

語錄曰二氣謂陰陽對峙各有所屬。陳氏曰

靈云者只是自然屈伸往來恁地活爾

以一氣言則至而伸者為神反

而歸者為鬼

語錄曰一氣即陰陽運行之氣至則皆至去則皆去之謂也。又曰以一氣言

則方伸之氣亦有伸有屈其方伸者神之伸其既屈者神之鬼既屈之氣亦有屈有伸其既屈者鬼之鬼

其來格者鬼之神天地人物皆然不離此氣之往來屈伸合散而已。陳氏曰自一氣言之則氣之方伸而來者屬陽為神氣之已屈而往者屬陰為鬼如春夏是氣之方長屬陽為神秋冬是氣之已退屬陰為鬼。○又曰神之為言伸也伸是氣之方長者鬼之為言歸也歸是氣之已退者其實一物而

已

陳氏曰其實則一物如手之正面屬陽覆手則屬陰

為德猶言性情功效

語錄

曰性情乃鬼神之情狀能使天下之人齊明盛服以承祭祀便是功效。○又曰視之而不見聽之而不聞是情性體物而不可遺是功效。○問有性情便有功效有功效便有性情所謂性情莫便是二氣之良能否所謂功效者莫便是天地之功用否曰鬼神視之而不見聽之而不聞人須是於那良能與功用上認取其德。○黃氏曰性情功效只是造化之迹日月自有日月之性情功效風雷自有風雷之性情功效

視之而弗見聽之而弗聞體物而不可遺

鬼神無形與聲然物之終始莫非陰陽合散之所為

是其為物之體而物所不能遺也

文集曰天地之升降日月之盈縮萬

物之消息變化無一非鬼神之所為者是以鬼神雖無形聲而徧體乎萬物之中物莫能遺○又曰鬼神者氣之往來須有此氣方有此物是為物之體也○又曰物之聚散始終無非二氣之往來伸屈是鬼神之德為物之體而無物能遺之也○語錄曰有是實理而後有是物鬼神之德所以為物之體而不可遺也

其言體物猶易所謂幹事

語錄曰體幹是主宰體物是與物為體幹事是

與事為幹

使天下之人齊明盛服以承祭祀洋洋乎如在其上如

在其左右

齊側皆反

齊之為言齊也所以齊不齊而致其齊也

易本義曰湛然純一

之謂齊。陳氏曰齊其思慮之不齊以至於齊

明猶潔也

陳氏曰是明潔其心

洋洋流

動充滿之意能使人畏敬奉承而發見昭著如此乃

其體物而不可遺之驗也

陳氏曰言鬼神之神無所不在能奉承畏敬則此理

昭然流動充滿於上下左右間此是鬼神陰陽之發見昭著處蓋體物而不遺之驗也

孔子曰

其氣發揚于上為昭明君蒿悽愴此百物之精也神

之著也正謂此爾

語錄曰如鬼神之露光處是昭明其氣蒸上處是焄蒿使人精神竦

然是悽愴○又曰昭明是先耀底焄蒿是哀然底悽愴是凜然底○又曰昭明乃先景之屬焄蒿氣之感觸人者悽愴如漢書所謂神君至其風颯然之慮○又曰焄蒿是鬼神精氣交感處

詩曰神之格思不可度思矧可射思

度待洛反射音亦詩作斃

詩大雅抑之篇格來也矧況也射厭也言厭怠而不

敬也

陳氏曰言神明之來視不見聽不聞皆不可得而測度矧可厭射而不敬乎

思語辭

夫微之顯誠之不可揜如此夫

扶夫音

誠者真實無妄之謂

陳氏曰誠字後世都說差了到程子方云無妄之謂誠字義始

明至朱子又增兩字曰真實無妄之謂尤見分明

陰陽合散無非實者故其

發見之不可揜如此

文集曰鬼神只是氣之屈伸其德則天命之實理所謂誠也。

又曰鬼神是實有者屈是實屈伸是實伸屈伸合散無非實者。又曰鬼神皆是實理處發見故未有此氣便有此理既有此理必有此氣。陳氏曰此理雖隱微而甚顯以陰陽之往來屈伸皆是真實而無妄所以發見之不可揜如此

右第十六章

不見不聞隱也體物如在則亦費矣此前三章以其費之小者而言此後三章以其費之大者

而言此一章兼費隱包小大而言

語錄曰不見不聞此正指

隱處如前後章只舉費以明隱也。○愚謂此前三章曰道不遠人曰素位而行曰行遠自邇者言日用之間事雖至近而道無不在此費之小者也。此後三章曰舜大孝曰文王無憂曰武王周公達孝者言道雖至近而推之則放乎至遠而無窮此費之大者也。此章曰不見不聞者即其體之隱而又曰體物如在所謂隱者亦未嘗不昭著此則兼費隱包小大而言也。

或問鬼神之說其詳奈何曰鬼神之義孔子所以告宰子者見於祭義之篇其說已詳而鄭氏釋之亦已明矣其以口鼻之呼吸者為竄耳目之精明

者為魄蓋指血氣之類以明之

語錄曰口鼻之噓吸以氣言也目之

精明以血言也耳之精明何故以血言醫家以耳屬腎精血盛則聽聰精血耗則耳聾矣氣為魂血為魄。問眼體也眼之光為魄耳體也何以為耳之魄曰能聽者便是如老人耳重目昏便是魄漸散
要
程子張子更以陰陽造化為說則其意又廣而

天地萬物之屈伸往來皆在其中矣

陳氏曰鬼神

子就陰陽二字發用之迹顯然可見者言之張子亦言二氣自然能如此大綱只是往來屈伸之謂耳
蓋陽竄為神陰魄為鬼

語錄曰問竄魄如何是陰陽曰魂如火魄如水

是以其在人也陰陽合則魄凝竄聚而有生陰陽

判則魂升為神魄降為鬼

語錄曰天地陰陽之氣交合便成人氣便是魂

精便是魄到得將死熱氣上出所謂魂升下體漸冷所謂魄降魂歸于天魄降于地而人死矣易

大傳所謂精氣為物遊魂為變故知鬼神之情狀

者正以明此

語錄曰精氣為物精與氣合而生者遊魂為變則氣散而死其魄降矣。

又曰精氣聚而為物何物而無鬼神遊魂為變魂遊則魄之降可知。陳氏曰陰精陽氣聚而生物

乃神之伸也而屬乎陽魂遊魄降散而為變乃而鬼之歸也而屬乎陰鬼神情狀大槩不過如此

書所謂徂落者亦以其升降為言耳

陳氏曰徂是魂之升上落

是魄之降下

若又以其往來者言之則來者方伸而為

神往者既屈而為鬼

陳氏曰氣之伸與來處屬陽為神氣之屈與往處屬陰為

鬼蓋本上下氣耳

蓋二氣之分實一氣之運故陽主伸陰

主屈而錯綜以言亦各得其義焉學者熟玩而精

察之

葉氏曰學者先看天地二氣之屈伸若朝暮若寒暑若榮謝大綱已明却反驗之一身自

父母成育之始及少長壯老之變起居動息晝夜夢覺熟體而精察之無餘蘊矣

如謝氏

所謂做題目入思議者則庶乎有以識之矣

案謝氏曰

這箇便是天地間妙用須是將來做箇題目入思議始得講說不濟事

曰諸說如何

曰呂氏推本張子之說尤為詳備

案呂氏曰鬼神者二氣之往來

爾物感雖微無不通於二氣故人有心雖自謂
隱微心未嘗不動動則固已感於氣矣鬼神安有
不見乎其心之動又必見於聲色舉動
之間人乘間以知之則感之著者也 但改本有

所屈者不亡一句

案呂氏曰往者屈也來者伸也所屈者不亡所伸者無息

乃

形潰反原之意張子他書亦有是說

案張子曰形聚為物形潰

反原反原者其游魂為變歟

而程子數辨其非東見錄中所謂

不必以既反之氣復為方伸之氣者其類可考也

案程子曰近取諸身百理皆具屈伸往來之義只於鼻息之間見之屈伸往來只是理不必將既屈之氣復為方伸之氣生生之理自然不息如復言七日來復其間元不斷續陽已復生物極必返其

理須如此有生便有死有始便有終。又曰若謂既返之氣復將為方伸之氣必資於此則殊與天地之化不相似天地之化自然生生不窮更何復資於既斃之形既返之氣以為造化近取諸身其開闔往來見之鼻息然不必須假吸復入以為呼氣則自然生人氣之生生於真元天之氣亦自然生生不窮至如海水因陽盛而涸及陰盛而生亦不是將已涸之氣却生水自然能生往來屈伸只是理也盛則便有衰盡則便有夜往則便有來。愚謂屈伸往來者氣也其所以屈伸往來者理也往而屈者其氣已散來而伸者其氣方生生之理自然不窮若謂以既屈之氣復為方伸之氣則是天地間只有許多氣來來去去是輪迴之說而非理之本然也

謝氏說則善矣

但歸根之云似亦微有反原之累耳

案謝氏曰動而不已其神

乎滯而有迹其鬼乎往來不息神也推仆歸根鬼也致生之故其鬼神致死之故其鬼不神何也人以為神則神以為不神則不神矣知死而致生之不智知死而致死之不仁聖人所為神明之也。語錄曰歸根本老氏語畢竟無歸這箇何曾動此性只是天地之性當初亦不是自彼來而入此亦不是自往而復歸如月影在這盆水裏除了這盆水這影便無了豈是這月飛上天去歸那月又如這花落便無這花了豈是歸去那裏明年又復來生這枝上

游楊之說皆有不

可曉者

案游氏曰道無不在鬼神具道之妙用也其德顧不盛歟夫欲知鬼神之德者反求

諸其心而已神將來舍則是神之格思也若正心以度之則乖矣所謂不可度思也正心度之猶不可又況得而忘之乎所謂不可射思也不可度故視不見聽不聞不可射故如其上如其左右

也夫微之顯如此以其誠之不可揜也誠則物物皆彰矣故不可揜微之顯者其理也誠之不可揜以其德言也。楊氏曰鬼神之德唯誠而已誠無幽明之間故其不可揜如此夫不誠則無物所謂體物而不可遺者尚何顯之有知此則知鬼神矣 唯妙萬物而無不在一

語近是而以其他語考之不知其於是理之實果

如何也

案楊氏曰鬼神體物而不可遺蓋其妙萬物而無不在故也

侯氏曰鬼神

形而下者非誠也鬼神之德則誠也案經文本贊

鬼神之德之盛如下文所云而結之曰誠之不可

揜如此則是以為鬼神之德所以盛者蓋以其誠

耳非以誠自為一物而別為鬼神之德也今侯氏
乃析鬼神與其德為二物而以形而上下言之乍
讀如可喜者而細以經文事理求之則失之遠矣

程子所謂只好隔壁聽者其謂此類也夫

案侯氏曰只是

鬼神非誠也經不曰鬼神而曰鬼神之為德其盛
矣乎鬼神之德誠也易曰形而上者謂之道形而
下者謂之器鬼神亦器也形而下者也學者心得
之可也。語錄曰侯氏解鬼神之為德謂鬼神為
形而下者鬼神之德為形而上者且如中庸之為
德不成說中庸形而下者中庸之德為形而上者
曰子之以幹事明體物何也曰天下之物莫非鬼

神之所為也故鬼神為物之體而物無不待是而有者然曰為物之體則物先乎氣必曰體物然後見其氣先乎物而言順耳

語錄曰不是有此物時便有此鬼神凡是

有這鬼神了方有此物及至有此物了又不能違乎鬼神也體物將鬼神做主將物做賓方看得出是鬼神去體那箇物鬼神却是主也幹猶木之有幹必先有此而後

枝葉有所附而生焉貞之幹事亦猶是也

子曰舜其大孝也與德為聖人尊為天子富有四海之

內宗廟饗之子孫保之

與平聲

子孫謂虞思陳胡公之屬

故大德必得其位必得其祿必得其名必得其壽

舜年百有十歲

故天之生物必因其材而篤焉故栽者培之傾者覆之

材質也篤厚也

語錄曰是因材而加厚些子

栽植也氣至而滋息

為培氣反而遊散則覆

語錄曰物若扶植種在土中自然生氣湊泊他若已傾

倒則生氣無所附著從何處來相接如人疾病此自有生氣則藥力之氣依之而生意滋長若已危殆則生氣流散而不復相湊矣。問上言德而受福而以氣為言者何曰道理是如此亦非定有箇物使之

然若是成時自節節悠地長將去恰似有箇物常扶助他若是敗時自節節悠地消磨將去恰似有箇物來推倒他道理都如此

詩曰嘉樂君子憲憲令德宜民宜人受祿于天保佑命之自天申之

詩大雅假樂之篇假當依此作嘉憲當依詩作顯申重也

故大德者必受命

受命者受天命為天子也

右第十七章

此由庸行之常推之以極其至見道之用廣也

而其所以然者則為體微矣後二章亦此意

或問十七章之說曰程子張子呂氏之說備矣

程案

子曰知天命是達天理也必受命是得其應也命者是天之付與如命令之命天之報應皆如影響得其報者是常理也不得其報者非常理也然而細推之則須有報應但人以淺狹之見求之便為差至天命不可易也然有可易者唯有德者能之如修養之引年世祚之祈天永命常人之至於聖賢皆此道也○張子曰德不勝氣性命於氣德勝其氣性命於德窮理盡性則性天命命天德氣之

不可變者獨死生修天而已故論死生則曰有命以言其氣也語富貴則曰在天以言其理也此大德所以必受命○呂氏曰天命之所屬莫踰於大德至於祿位名壽之皆極則人事至矣天命申矣天之萬物其所以為吉凶之報莫非因其所自取也植之固者加雨露之養則其末必盛茂植之不固者震風凌雨則其本先撥至于人事則得道者多助失道者寡助是皆因其材而篤焉栽者培之傾者覆之者也古之君子既有憲憲之令德而又宜民宜人之大功此宜受天祿矣故天保佑之申之以受天命此大德所以必受命是亦栽者培之之義與○又曰命雖不易惟至誠不息亦足以移之此大德

楊氏所辨孔子不受命之意則亦程

子所謂非常理者盡之

案楊氏曰孔子當衰周之時猶之生非其地也雖其

雨露之滋而牛羊斧斤相尋於其上則其濯濯然也豈足怪哉而侯氏所推以謂

舜得其常而孔子不得其常者尤明白也

案侯氏曰舜匹

夫也而有天下此所謂必得者先天而天弗違也孔子亦匹夫也亦德為聖人也而不得者後天而奉天時也必得者理之常也不得者非常也得其常者舜也不得其常者孔子也至於顏

跖壽夭之不齊則亦不得其常而已楊氏乃忘其所以論孔子之意而更援老聃之言以為顏子雖天而不亡者存則反為衍說而非吾儒之所宜言矣且其所謂不亡者果何物哉若曰天命之性則

是古今聖愚公共之物而非顏子所能專若曰氣散而其精神魂魄猶有存者則是物而不化之意猶有滯於冥漠之間尤非所以語顏子也

案楊氏曰顏跖

之夭壽不齊何也老子曰死而不亡曰壽顏雖夭而不亡者猶在也非夫知性知天者其孰能識之

侯氏所謂孔子不得其常者善矣然又以為天於孔子固已培之則不免有自相矛盾處蓋德為聖人者固孔子之所以為裁者也至於祿也位也壽也則天之所當以培乎孔子者而以適丁氣數之

袁是以雖欲培之而有所不能及爾是亦所謂不

得其常者何假復為異說以汨之哉

案侯氏曰天之生物必因

其材而篤焉哉者培之傾者覆之如孔子者培之耶覆之耶何其窮也曰培之覆之非謂如孔子者也孔子德為聖人其名與祿壽孰禦焉固已培之矣孟子所謂天爵者也何歎於人爵哉

子曰無憂者其惟文王乎以王季為父以武王為子父作之子述之

此言文王之事書言王季其勤王家蓋其所作亦積

功累仁之事也

語錄曰自公劉太王積功累仁至文王適當天運恰好處

武王纘大王王季文王之緒壹戎衣而有天下身不失天下之顯名尊為天子富有四海之內宗廟饗之子孫

保之

大音泰下同

此言武王之事纘繼也大王王季之父也書云大王

肇基王迹

三山陳氏曰周家之業自大王遷岐從如歸市是時人心天意已有為王之基矣

詩云至于大王實始翦商

詩傳曰翦斷也。蔡氏曰大王雖未始有翦商之志

然大王始得民心王業之成實基於此

緒業也戎衣甲冑之屬壹戎衣

武成文言一著戎衣以伐紂也

三山陳氏曰武王一擐戎衣以有天下此

蓋天命人心之
極不得而辭者

武王末受命周公成文武之德追王大王王季上祀先
公以天子之禮斯禮也達乎諸侯大夫及士庶人父為
大夫子為士葬以大夫祭以士父為士子為大夫葬以
士祭以大夫期之喪達乎大夫三年之喪達乎天子父
母之喪無貴賤一也

追王之
王去聲

此言周公之事末猶老也追王蓋推文武之意以及
乎王迹之所起也

語錄曰問牧野之奠追王太王王
季文王疑武王時已追王曰武王

之時恐只是喚呼作玉至周公制禮樂方行其先公事如今奉上冊寶之類然無可證姑闕之可也

組紃以上至后稷也

愚案組紃大王之父也

上祀先公以天子

之禮又推大王王季之意以及於無窮也

語錄曰禮家載祀先王服

衾冕祀先公服驚冕驚冕諸侯之服雖上祀先公以天子之禮然不敢以天子之服臨其先公但驚冕七旒十二玉與諸侯不同○愚謂組紃以上雖追王所不及然又欲推大王王季之意故以天子之禮祀之

制為禮法以及天下使葬用死者之爵祭用生者之

祿喪服自期以下諸侯絕大夫降

語錄曰如期之喪天子諸侯絕大夫

降然諸侯大夫尊同則亦不絕不降姊妹姪在諸侯則亦不絕不降而父母之喪上下

同之

永嘉陳氏曰伸情於父母處獨齊哀之喪上同於天子其他各有限節等殺不可盡伸也

推

已以及人也

陳氏曰周公以文武之意追尊其先祖又設為禮法通行此意於天下

右第十八章

子曰武王周公其達孝矣乎

達通也承上章而言武王周公之孝乃天下之人通

謂之孝

陳氏曰通天下皆稱之非一人私謂之孝也真氏曰舜之孝如天之不可名故曰大武

王周公之孝天下稱之無異辭故曰達

猶孟子之言達尊也

夫孝者善繼人之志善述人之事者也

上章言武王纘大王王季文王之緒以有天下而周公成文武之德以追崇其先祖此繼志述事之大者也下文又以其所制祭祀之禮通于上下者言之

春秋脩其祖廟陳其宗器設其裳衣薦其時食

祖廟天子七諸侯五大夫三適士二官師一

文集曰
王制天

子七廟三昭三穆與太祖之廟而七諸侯大夫士降殺以兩而祭法又有適士二廟官師一廟之文大抵士無太祖而皆及其祖考也。語錄曰適士二廟即祭祖祭禰皆不及高曾大夫三廟一昭一穆與太祖廟而三大夫亦有始封者。又曰官師諸有司之長也只是一廟祭得父母更不及祖矣位卑則流渾淺

其理自然如此問今雖士庶人家亦祭三代如此却是違禮曰雖祭三代却無廟亦不可謂之僭古之所謂廟者其體面甚大皆是門堂寢室勝如所居之宮非如今人但以二室為之宗器先世所

藏之重器若周之赤刀大訓天球河圖之屬也

蔡氏曰赤

刀赤削也大訓三皇五帝之書訓誥亦在馬文武之訓亦曰大訓球鳴球也玉磬名河圖伏羲時龍馬負圖出於河所謂一六位北二七位南三八位東四九位西五十位中者易大傳所謂河出圖是也

裳

衣先祖之遺衣服祭則設之以授尸也

愚謂如守祧所藏者是也

祭以授尸所以依神也

時食四時之食各有其物如春行羔豚

膳膏香之類是也

愚謂四時之食各有其物以其所以奉諸人者薦諸神蓋以生事之

也羔羝羊也豚豕也物嫩而肥故用之於春
香謂牛膏也調膳之時各以物之所便而和之

宗廟之禮所以序昭穆也序爵所以辨貴賤也序事所以辨賢也旅酬下為上所以逮賤也燕毛所以序齒也

昭如字
為去聲

宗廟之次左為昭右為穆而子孫亦以為序

文集曰昭穆之

次既定則其子孫亦以為序禮所謂昭與昭齒穆與穆齒者是也

有事於太廟則子

姓兄弟羣昭羣穆咸在而不失其倫焉

愚謂左昭右穆者死者之

昭穆也羣昭羣穆者生者之昭穆也宗廟之禮非特序死者之昭穆亦所以序生者之昭穆

爵公

侯卿大夫也事宗祝有司之職事也旅衆也酬導飲也旅酬之禮賓弟子兄弟之子各舉觶於其長而衆相酬蓋宗廟之中以有事為榮故逮及賤者使亦得

以申其敬也

語錄曰主人酌以獻賓賓酢主人曰酢主又自飲而復飲賓曰酬其主人又自

飲者是導賓使飲也賓受之却不飲奠於席前至旅時亦不舉又自別舉爵間行旅酬時祭事已畢否曰其大節目則已了亦尚有零碎禮數未竟又問想在飲福受胙之後曰固是古人酢賓便是受胙昨昨與酢字古通用。又曰旅酬者以其家臣或鄉吏之屬大夫則有卿吏一人先舉觶獻賓賓飲畢即以觶授于執事者執事者則以獻於其長遞遞相承獻及於沃盥者而止馬沃盥謂執盥洗之事至賤者也

燕

毛祭畢而燕則以毛髮之色別長幼為坐次也齒年

數也

語錄曰燕時擇一人為上賓不與眾賓齒餘者皆序齒

踐其位行其禮奏其樂敬其所尊愛其所親事死如事生事亡如事存孝之至也

踐猶履也其指先王也

葉氏曰其字指文王而言

所尊所親先王

之祖考子孫臣庶也始死謂之死既葬則曰反而亡焉皆指先王也此結上文兩節皆繼志述事之意也郊社之禮所以事上帝也宗廟之禮所以祀乎其先也

明乎郊社之禮禘嘗之義治國其如示諸掌乎

郊祭天社祭地不言后土者省文也

語錄曰周禮只說祀昊天上帝

不說祀后土先儒說祭社便是如郊特牲社稷太牢又如用牲于郊牛二及社于新邑此乃明驗

禘

天子宗廟之大祭追祭太祖之所自出於太廟而以

太祖配之也

語錄曰禘只祭始祖及所自出之帝二者而已。又曰程子曰禘其祖之所自

出始封姓者也其祖配之以始祖配也文武必以稷配後世必以文王配所出之祖無廟於太祖之廟祀

之而已

嘗秋祭也四時皆祭舉其一耳禮必有義對舉

之互文也示與視同視諸掌言易見也此與論語文

意大同小異記有詳略耳

右第十九章

或問十八章十九章之說曰呂氏楊氏之說於禮之節文度數詳矣其間有不同者讀者詳之可也

案呂氏曰期之喪達乎大夫者期之喪有二有正統之期為祖父母者也有旁親之期為世父母叔父母眾子昆弟昆弟之子是也正統之期雖天子諸侯莫降旁親之期天子諸侯絕服而大夫降所謂尊不同故或絕或降也大夫雖降猶服大功不如天子諸侯之絕服也如旁親之期亦為大夫則大夫亦不降所謂尊同則服其親之服也諸侯雖絕服旁親尊同亦不降所不臣者猶服之如始封

之君不臣諸父昆弟封君之子不臣諸父而臣昆弟是也三年之喪達乎天子者三年之喪為父為母適孫為祖為長子為妻而已天子達乎庶人一也父在為母及妻雖服期然本為三年之喪但為父為夫屈者也故與齊期之餘喪異者有三服而加杖一也十一月而練十三月而祥十五月而禫二也夫必三年而後娶三也周穆后崩太子晉卒叔向曰王一歲而有三年之喪二則包后亦為三年也。又曰宗廟之禮所以序昭穆別入倫也親親之義也父為昭子為穆父親也親者通則不可不別也祖為昭孫亦為昭祖為穆孫亦為穆祖尊也尊者遠則不嫌於無別也故孫可以為王父尸子不可以為父尸此昭穆之別於尸者也喪禮卒哭而祔男祔于皇祖考女祔于皇祖妣婦祔于皇祖姑喪服小記士大夫不得祔于諸侯祔于諸祖父之為士大夫者亡則中一以上而祔祔必以其

昭穆此昭穆之別于祔者也有事于太廟子姓兄弟亦以昭穆別之羣昭羣穆不失其倫凡賜爵昭與昭齒穆與穆齒此昭穆之別於宗者也序爵者序諸侯諸臣與祭者之貴賤也貴貴之義也詩曰相維辟公天子穆穆此諸侯之助祭者也於穆清廟肅雍顯相濟濟多士秉文之德此諸臣之助祭者也序事者別賢與能而授之事也尊賢之義也孰可以為宗而詒相孰可以為祝而祝嘏孰可以贊裸獻孰可以執籩豆至于執爵沃盥莫不辨其賢能之大小而序之也旅酬下為上者使賤者亦得申其敬也下下之義也若持牲饋食之禮賓弟子兄弟弟子各舉解於其長以行旅酬於宗廟之中以有事為榮也燕毛者既祭而燕則尚齒也長長之義也毛髮色也以髮色別長少而為之序也祭則貴貴貴貴則尚爵燕則親親親親則尚齒其義一也天下之大經親親長貴尊賢而已人

君之至恩下下而已一祭之間大經以正至恩以宣天下之事盡矣。楊氏曰祭有昭穆所以別父子遠近長幼親疎之序也故有事于太廟則羣昭羣穆咸在而不失其倫焉此宗廟之禮所以序昭穆也尸飲五君洗玉爵獻御尸飲七以瑤爵獻大夫尸飲九以散爵獻士及羣有司此序爵而尊卑有等所以辨貴賤也玉幣交神明也裸鬯求神於幽也故天地不裸則玉幣尊於鬯也故太宰贊之鬯則大宗伯蒞之裸時又卑於鬯也故小宰贊之若此類所謂序事也先王量德授位因能授職此序事所以辨賢也饋食之終醕尸之獻下逮羣有司更為獻酬此旅酬下為上所以遠賤也既祭而以燕毛為序所以序齒也序昭穆親親也序爵貴貴也序事尚德也旅酬逮賤燕毛序齒尚恩也敬親者不敢慢於人況其所尊乎愛親者不敢惡於人況其所親乎事死如事生若餘闕之莫是也事亡

如事存若齊必見其所祭者是也

游氏引泰誓武成以為文王未

嘗稱王之證深有補於名教

案游氏曰武王於泰誓三篇稱文王為文

考至武成而柴望然後稱文考為文王仍稱其祖為太王王季然則周公追王大王王季者乃文王之德武王之志也故曰成文武之德不言文王者武王既追王矣武王既追王而不及大王王季以其未受命而其序有未暇也禮記大傳載牧野之奠追王大王王季王季歷文王昌亦據武成之書以明追王之意出於武王也世之說者因中庸無追王文王之文遂以謂文王自稱王豈未嘗考泰誓武成之書乎君臣之分猶天尊地卑紂未可去而文王稱王是二天子也曾謂至德如文王一言一動順帝之則而反盜虛名而拂天理乎且武王觀政于商而須暇之五年非偽為也使紂一日有

俊心則武王當與天下共尊之必無牧野之事然則文王已稱之名將安所歸乎此天下之大戒故不得然歐陽蘓氏之書亦已有是說矣

案歐陽氏曰孔子曰

三分天下有其二以服事商使西伯不稱臣而稱王安能服事於商乎伯夷叔齊讓國而去顧天下皆莫可歸往歸西伯當是時紂雖無道天子在上諸侯不稱臣而稱王是僭叛之國也彼二子者不食其粟而非其子此豈近於人情耶由是言之謂西伯受命稱王十年者妄說也泰誓稱十有一年說者謂自文王受命九年及武王居喪二年并數之是以聽虞芮之訟謂之受命以為元年古者人君即位必稱元年西伯即位已改元矣中間不宜改元而又改元至武王即位宜改元而反不改元乃上冒先君之元年并其居喪稱十一年及其滅商而得天下其事大於聽訟遠矣又不改元由是言

之謂西伯以受命之年為元年者妄說也。○案眉山二蘇氏說與歐陽氏殊不同朱子所引未知何蘇氏也
當考 郊禘呂游不同然合而觀之亦表裏之說

也 案呂氏曰事上帝者所以立天下之大本道之所由出也祀乎其先者所以正天下之大經仁義之所由始也洋洋乎如在其上如在其左右雖隱微之間恐懼戒慎而不敢欺則所以養其誠心至矣蓋以為不如是則不足以立身身且不立烏能治國家哉。○游氏曰祭祀之義非精義不足以究其說非體道不足以致其義蓋惟聖人為能饗帝為其盡人道而與帝同德孝子為能饗親為其盡子道而與親同心也仁孝之至通乎神明而神祇祖考安樂之則於郊社之禮禘嘗之義始可以言明矣夫如是則於
○曰昭穆之昭世讀為韶今為天下國家也何有

從本字何也曰昭之為言明也以其南面而向明也其讀為韶先儒以為晉避諱而改之然禮書亦

有作佻字者則假借而通用耳

愚案晉避司馬昭之諱故改昭為韶

曰其為向明何也曰此不可以空言曉也今且假

設諸侯之廟以明之蓋周禮建國之神位左宗廟

則五廟皆當在公宮之東南矣其制則孫毓以為

外為都宮太祖在北二昭二穆以次而南是也

語錄

曰孫毓說出江都集禮○愚案孫毓云宗廟之制外為都宮內各有寢廟別有門垣太祖在北左昭

右鵠差
次而南

蓋太祖之廟始封之君居之昭之北廟二

世之君居之穆之北廟三世之君居之昭之南廟

四世之君居之穆之南廟五世之君居之廟皆南

向各有門堂寢室而牆宇四周焉

文集曰一世各
為一廟廟有門

有堂有室有房有夾
室有寢四面有牆

太祖之廟百世不遷自餘四

廟則六世之後每一易世而一遷其遷之也新主

祔于其班之南廟南廟之主遷於北廟北廟親盡

則遷其主於太廟之西夾室而謂之祧

語錄曰古
者始祖之

廟有夾室凡祀主皆藏之於夾室

凡廟主在本廟之室中皆東向

及其祫於太廟之室中則唯太祖東向自如而為

最尊之位羣昭之入乎此者皆列於北牖下而南

向羣穆之入乎此者皆列於南牖下而北向

文集曰古

人廟堂南向室在其北東戶西牖皆南向室西南隅為與尊者居之故神主在焉詩所謂宗室牖下者也主既在西壁下即須東向故行事之際主人入戶西向致敬凡廟皆南向而主皆東向惟祫祭之時羣昭羣穆皆升合食于太祖之時則太祖之主仍東向自如羣昭南向羣穆北向列於太祖之前此前代禮官所謂太祖正東向之位者為祫祭時言也非祫時則羣廟之主在其廟中無不東向

矣南向者取其向明故謂之昭北向者取其深遠故謂之穆蓋羣廟之列則左為昭而右為穆祫祭之位則北為昭而南為穆也曰六世之後二世之主既祧則三世為昭而四世為穆五世為昭而六世為穆乎曰不然也昭常為昭穆常為穆禮家之說有明文矣蓋二世祧則四世遷昭之北廟六世祧昭之南廟矣三世祧則五世遷穆之北廟七世祧穆之南廟矣昭者祔則穆者不遷穆者祔則昭

者不動

文集曰遷毀之序則昭常為昭穆常為穆假令新死者當祔昭廟則毀高祖之廟而

祔其主于左祧遷其祖之主于高祖之故廟而祔新死者于祖之故廟即當祔於穆者其序亦如此

祔昭則羣昭皆動而穆不移祔穆則羣穆皆移而昭不動此所以祔必以班

文集

曰儀禮所謂以其班祔檀弓所謂祔于祖父是也

尸必以孫

語錄曰古者立尸必隔一

位孫可以為祖尸子不可以為父尸以昭穆不可亂也

而子孫之列亦以為

序若武王謂文王為穆考成王稱武王為昭考則

自其始祔而已然而春秋傳以管蔡邲霍為文之

昭邲晉應韓為武之穆則雖其既遠而猶不易也

豈其交錯彼此若是之紛紛哉

愚按后稷至文武十有六世文王於廟次

為穆故謂其子為昭管蔡邠霍者文王之子也武王於廟次為昭故謂其子為穆邠晉應韓者武王之

之子也

曰廟之始立也二世昭而三世穆四世昭而

五世穆則固當以左為尊而右為卑矣今乃三世穆而四世昭五世穆而六世昭是則右反為尊而左反為卑也而可乎曰不然也宗廟之制但以左右為昭穆而不以昭穆為尊卑故五廟同為都宮則昭常在左穆常在右而外有以不失其序一世

自為一廟則昭不見穆穆不見昭而內有以各全

其尊

文集曰諸廟別有門垣足以各全其尊初不以左右為尊卑也

必大禘而會

於一室然後序其尊卑之次則凡已毀未毀之主

又畢陳而無所易

文集曰一昭一穆固有定次而其自相為偶亦不可易但其散

居本廟各自為主而不相厭則武王進居王季之位而不嫌尊於文王及其合食于祖則王季雖遷而武王自當與成王為偶未可以遽進而居王季之處也唯四時之禘不陳毀

廟之主

愚謂禘祭有二曾子問曰禘祭於祖則祝迎四廟之主王制云天子禘嘗禘烝諸侯

嘗禘烝禘此時祭之禘也公羊傳曰毀廟之主陳于大祖未毀廟之主皆升合食于大祖此大禘毀

廟未毀廟之則高祖有時而在穆其禮未有考焉
主而祭之也

意或如此則高之上無昭而特設位於祖之西禰

之下無穆而特設位於曾之東也與

語錄曰高祖四世祖也世

與太字古多互用如太子為世子太室為世室之
類○問高為穆之義曰新死之主新祔便在昭這
一排且如諸侯五廟一是大祖便居中二昭二穆
相對令新死者祔則高過昭穆這一排對空坐禰
在昭一排亦對坐以意推曰然則毀廟云者何也
之當是如此但禮經難考

曰春秋傳曰壞廟之道易檐可也改塗可也說者
以為將納新主示有所加耳非盡撤而悉去之也

語錄曰改塗易檐言不是盡除
只改其灰飾易其屋檐而已

曰然則天子之廟

其制若何曰唐之文祖虞之神宗商之七世三宗
其詳今不可考獨周制猶有可言然而漢儒之記

又已有不同矣謂后稷始封文武受命而王故三

廟不毀與親廟四而七者諸儒之說也

文集曰韋元成等謂

王者始受命諸侯始封之君皆為太祖以下五世
而迭毀毀廟之主藏於太祖周之所以七廟者以
后稷始封文武受命三謂三昭三穆與太祖之廟
廟不毀與親廟四而七

而七文武為宗不在數中者劉歆之說也

文集曰歆謂七

者其正法數可常數者宗不在此數中宗變也苟
有功德則宗之不可預為設數故於殷有三宗周
公舉之以勸成王由是言之宗無數也雖其數之不同然其位置遷

次宜亦與諸侯之廟無甚異者但如諸儒之說則
武王初有天下之時后稷為太祖而組紂居昭之
北廟太王居穆之北廟王季居昭之南廟文王居
穆之南廟猶為五廟而已至成王時則組紂祧王
季遷而武王祧至康王時則太王祧文王遷而成
王祧至昭王時則王季祧武王遷而康王祧自此

以上亦皆且為五廟而祧者藏於太祖之廟至穆
王時則文王親盡當祧而以有功當宗故別立一
廟於西北而謂之文世室於是成王遷昭王祔而
為六廟矣至共王時則武王親盡當祧而亦以有
功當宗故別立一廟於東北謂之武世室於是康
王遷穆王祔而為七廟矣自是以後則穆之祧者
藏於文世室昭之祧者藏於武世室而不復藏於
太廟矣如劉歆之說則周自武王克商即增立二

廟於二昭二穆之上以祀高圉亞圉如前遞遷至於懿王而始立文世室於三穆之上至孝王時始

立武世室於三昭之上此為少不同耳

文集曰昭之二廟親

盡則毀而遷其主于昭之宗曾祖遷于昭之二新入廟者祔于昭之三而高祖及祖在穆如穆廟親盡放此新死者如當為昭則祔於昭之近廟而自近廟遷其祖於昭之次廟而於主祭者為曾祖自次廟遷其高祖於昭之世室蓋於主祭者為五世而親盡故也其穆之兩廟如故不動其次廟於主祭者為高祖其近廟於主祭者為祖也主祭者沒則祔于穆之近廟而遞遷其主於此。語錄曰天子七廟如周文武之廟不祧文為穆則凡後之屬乎穆者皆歸於文之廟武為昭則凡後之為昭者

皆歸乎武之廟也。○愚謂父昭子穆而有常數者禮也。祖功宗德而無定法者義也。周於三昭三穆之外而有文武之廟。觀春秋傳稱襄王致文武於齊侯。史記稱顯王致文武於秦孝公。方是時文武固已遠矣。襄王顯王猶且祀之。則其廟不毀可知矣。曰然則諸儒與劉歆

之說孰為是。曰前代說者多是劉歆。愚亦意其或

然也。

語錄曰歆說得較是他謂宗不在七廟中者恐有功德者多則占了那七廟數也。○愚謂

若從諸儒之說則王者不過立親廟四與太祖為五其與諸侯五廟又何別乎商書已云七世之廟可以觀德則自昔有七廟矣故朱子以歆說為是曰祖功宗德之說尚矣

而程子獨以為如此則是為子孫者得擇其先祖

而祭之也子亦嘗考之乎曰商之三宗周之世室見於經典皆有明文而功德有無之實天下後世自有公論若必以此為嫌則秦政之惡夫子議父

臣議君而除謚法者不為過矣

語錄曰商之三宗若不是別立廟只

是親廟時何不胡亂將三箇來立如何恰曰取祖甲太戊高宗為之那箇祖有功宗有德天下後世自有公論不以揀擇為嫌所謂名之曰幽厲雖孝子慈孫百世不能改那箇好底自是合當祭祀如何毀

得且程子晚年嘗論本朝廟制亦謂太祖太宗

皆當為百世不遷之廟以此而推則知前說若非

記者之誤則或出於一時之言而未必其終身之

定論也

案程子曰祖有功宗有德文武之廟永不朽也所祀者文武以下廟如本朝太祖太

宗皆萬世不朽之廟河東閻曰然則大夫士之制

浙皆太宗取之無可祀之理奈何曰大夫三廟則視諸侯而殺其二然其太祖

昭穆之位猶諸侯也適士二廟則視大夫而殺其

一官師一廟則視大夫而殺其二然其門堂室寢

之備猶大夫也

語錄曰古者各有始祖之廟以藏

三問是曰廟之為數降殺以兩而其制不降何也

曰降也天子之山節藻梲複廟重檐諸侯固有所

不得為者矣

愚案山節謂構榑刻為山形即今之斗拱藻梲者謂侏儒柱畫為藻文梁

上短柱也複廟者上下重屋也重檐重承壁材也謂就外檐下壁復安板檐以辟風雨之灑壁諸

侯之黜陟大夫有不得為矣

愚案黜黑也陟白也地謂之黜

牆謂之墜斷削也磨磨也

大夫之倉楹斲桷士又不得為矣

愚案

倉楹者蒼其柱也斲桷者磨其榑也

曷為而不降哉獨門堂室寢之

合然後可名於宮則其制有不得而殺耳蓋由命

士以上父子皆異宮生也異宮而死不得異廟則

有不得盡其事生事存之心者是以不得而降也
曰然則後世公私之廟皆為同堂異室而以西為
上者何也曰由漢明帝始也夫漢之為禮略矣然
其始也諸帝之廟皆自營之各為一處雖其都宮
之制昭穆之位不復如古然猶不失其獨專一廟
之尊也

語錄曰西漢時高帝廟文帝廟成之廟猶各在一處但無法度不同一處。愚案漢

不特高文有廟景帝廟號德陽武帝廟號龍淵昭
帝廟號辨白宣帝廟號樂游元帝廟號長壽成帝
廟號至

陽也至於明帝不知禮義之正而務為抑損之私

遺詔藏主於光烈皇后更衣別室而其臣子不敢

有加焉

文集曰明帝又欲遵儉自抑遺詔無起寢廟但藏其主於光武廟中更衣別室其後

章帝又復如之後世遂不敢加而魏晉循之遂不
公私之廟皆為同堂異室之制

能革而先王宗廟之禮始盡廢矣降及近世諸侯
無國大夫無邑則雖同堂異室之制猶不能備獨
天子之尊可以無所不致顧乃梏於漢明非禮之
禮而不得以致其備物之孝蓋其別為一室則深
廣之度或不足以陳鼎俎而其合為一廟則所以

尊其太祖者既褻而不嚴所以事其親廟者又厭而不尊是皆無以盡其事生事存之心而當世宗

廟之禮亦為虛文矣

文集曰更歷魏晉下及隋唐其間非無奉先思孝之君

經守禮之臣而皆不能有所裁正其弊至使太祖之位下同孫子而更僻處於一隅既無以見其為七廟之尊羣廟之神則又上厭祖考而不得自為一廟之主以人情而論之則生居九重窮極壯麗而沒祭一室不過尋丈之間甚或無地以容鼎俎而陰損其數子孫之心宜亦有所不安矣

宗

廟之禮既為虛文而事生事存之心有終不能以自己者於是原廟之儀不得不盛然亦至于我朝

而後都宮別殿前門後寢始略如古者宗廟之制

文集曰本朝原廟之制外為都宮而各為寢廟門垣是其沿襲之變不唯窮

鄉賤士有不得聞而自南渡之後故都淪沒權宜

草創無復舊章則雖朝廷之上禮官博士老師宿

儒亦莫有能知其原者幸而或有二知經學古

之人乃能私議而竊歎之然於前世則徒知譏孝

惠之飾非責叔孫通之舞禮而於孝明之亂命與

其臣子之苟從則未有正其罪者於今之世則又

徒知論其惑異端徇流俗之為陋而不知本其事
生事存之心有不得伸於宗廟者是以不能不自

致於此也

文集曰不起寢廟之詔明帝固不得為
無失然使章帝有魏顆之孝其羣臣有

宋仲幾蕤子囊之忠則於此別有處矣况以一時
之亂命而壞千古之彙制其事體之輕重又非如
三子者之所正者而已耶○又曰如李氏所謂略
于七廟之室而為祠於佛老之側不為木主而為
之象不為禘祫烝嘗之祀而行一酌奠之禮楊氏
所謂舍二帝三王之正禮而從一繆妄之叔孫通
者其言皆是也然不知其所以致此則由於宗廟
不立而人心有所不安也不議復此而徒欲廢彼
亦安得為至
當之論哉
抑嘗觀於陸佃之議而知神祖之嘗

有意於此矣然而考於史籍則未見其有紀焉若
曰未及營表故不得書則後日之秉史筆者即前
日承詔討論之臣也所宜深探遺旨特書總叙以
昭示來世而略無一詞以及之豈天未欲使斯人
者復見二帝三王制作之盛故尼其事而嗇其傳

耶嗚呼惜哉

文集曰神祖慨然深詔儒臣討論舊典蓋將以逮迹三代之隆一正千古

之繆甚盛舉也不幸未及營表世莫得聞秉筆之士又復不能特書其事以詔萬世今獨其見於陸氏之文者為可考耳然陸氏所定昭穆之次又與前說不同

文集曰佃謂昭穆者父子之號昭以明下為義穆以恭上為義方其為父則稱昭取其昭以明下也方其為子則稱穆取其穆以恭上也豈可膠哉殊不知昭穆本以廟之居東居西主之向南向北而得名初不為父子之號也必曰父子之號則穆之子又安可復為昭哉且必如佃說新死者必入穆廟而自其父以上穆遷於昭昭遷於穆祔一神而六廟皆為之動則其祔也又何不直祔於父而必隔越一世以祔于其而張琥之議庶幾近之語錄曰所未應入之廟乎而張琥之議庶幾近之佃以為祔廟祔廟皆移一匝號以讀為更詳考之則當知為祔廟祔廟只移一位

所擇矣

袁公問政

哀公魯君名蔣

子曰文武之政布在方策其人存則其政舉其人亡則其政息

方版也策簡也

愚謂木曰方竹曰策策以束聯方一而已先方而後策者小大之序聘禮

束帛加書百名以上書于策不及百名書於方既夕禮書賜於方若九若七若五書遺於策

息猶

滅也有是君有是臣則有是政矣

人道敏政地道敏樹夫政也者蒲盧也

扶夫音

敏速也蒲盧沈括以為蒲葦是也以人立政猶以地

種樹其成速矣

三山陳氏曰人有良心人之道也敏於從政令之必行地有生意地之道

也敏於種樹而蒲葦又易生之物其成尤速也三山陳氏

曰人之易化於政可見物之易生於蒲葦可見言人存政舉其易如此

故為政在人取人以身脩身以道脩道以仁

此承上文人道敏政而言也為政在人家語作為政在於得人語意尤備人謂賢臣身指君身道者天下

之達道

文集曰道是統言義理公共之名

仁者天地生物之心而人

得以生者所謂元者善之長也

文集曰天地以生物為心者也而一物之生又

各得夫天地之心以為心者也。又曰仁乃天地生物之心而在人者故將為衆善之長。語錄曰元者

天地生物之端倪也。仁便是這意思。又曰：須先截得元與仁是箇甚物事。只是初底意思便是。又曰：元亨利貞皆是善，而元則為善之長，亨利貞皆是那裏來仁義禮智亦皆善也。而仁則為萬善之首，義禮智皆從這裏出。言人君為政在於得人而取人之則又在

脩身

三山陳氏曰：為政雖在得賢，然使吾身有所未修，則取舍不明，無以為取人之則。

能仁

其身則有君有臣而政無不舉矣

仁者人也。親親為大義者宜也。尊賢為大親親之殺尊

賢之等禮所生也

殺去

人指人身而言

真氏曰：人之所以為人者，以其有是仁也。有是仁而後命之曰人，不然則

非人矣

具此生理自然便有惻怛慈愛之意深體味之

可見

語錄曰以生字說仁生自是上一節事當來天地生我底意我如今須要自體認得

宜者

分別事理各有所宜也

語錄曰宜是指事物當然之理。又曰道理宜如此

禮

則節文斯二者而已

語錄曰節者等級也文不直回互之貌。又曰文是裝裹得好

如升降揖遜。

陳氏曰節則無太過文則無不及。

三山陳氏曰親親之中有隆殺觀五服之義可見矣尊賢之中有等降觀隆師親友之類可推矣惟其有等殺而後禮生焉孟子所謂節文斯二者是也

在下位不獲乎上民不可得而治矣

鄭氏曰此句在下誤重在此

故君子不可以不脩身思脩身不可以不事親思事親不可以不知人思知人不可以不知天

為政在人取人以身故不可以不脩身

語錄曰根本在修身脩

身以道脩道以仁故思脩身不可以不事親

語錄曰事親是

仁之根實處最初發得來分曉。三山陳氏曰修身而不本於事親則施之無序失為仁之本矣欲

盡親親之仁必由尊賢之義故又當知人

語錄曰知人只如知

人則哲之知不是思欲事親先要知人只是思欲事親更要知人若不好底人與他處豈不為親之累。

三山陳氏曰事親之仁不由尊賢之義則善惡不明失事理之宜矣

親親之殺尊賢之

等皆天理也故又當知天

語錄曰修身得力處却是知天知天是知至物格知

得箇自然道理學若不知天理記得此又忘彼得其一失其二未知天見事頭頂多既知天了這裏便都

定這事也定那事也定

又曰知天是起頭處能知

天則知人事親修身皆得其理矣

○三山陳氏曰事

親知人而等殺不明不知天理者也書曰天秩有禮故於此又當知天自禮所生也以上推其理之所由生自君子不可不修身以下釋其義之所以貫

天下之達道五所以行之者三曰君臣也父子也夫婦

也昆弟也朋友之交也五者天下之達道也知仁勇三

者天下之達德也所以行之者一也

知去聲

達道者天下古今所共由之路即書所謂五典孟子

所謂父子有親君臣有義夫婦有別長幼有序朋友

有信是也

三山陳氏曰書言五典孟子言五者人之大倫典常也倫理也出於天理而可以常

行其中庸達道之謂乎

知所以知此也仁所以體此也勇所以

強此也

語錄曰理會得底是知行得底是仁著力去做底是勇。潘氏曰體謂所存守處

謂

之達德者天下古今所同得之理也一則誠而已矣

蔡氏曰達道本於達德而達德又本於誠誠者達道達德之本而一貫乎達道達德者也。真氏曰一者

誠也三者皆真實而无妄是之謂誠

達道雖人所共由然無是三德則

無以行之

真氏曰道雖人所共由然其知不足以及之則君之當仁臣之當敬子之當孝父之

當慈未必不昧其所以然知雖及之而仁不能守仁雖能守而勇不能斷則於當行之理或奪於私欲或

蔽於利害以至蔑天常而敗人紀者多矣

達德雖人所同得然一有不誠

則人欲間之而德非其德矣

真氏曰德雖人所同得然或勉強焉或矯飾焉

則智出於數術仁流於姑息勇過於彊暴而德非其德矣故行之必本於誠

程子曰所謂

誠者止是誠實此三者三者之外更別無誠

語錄曰知仁勇

是做底事誠是行此三者都要實。陳氏曰只是實有是知實有是仁實有是勇而已不誠實則無三者之德矣

或生而知之或學而知之或困而知之及其知之一也或
安而行之或利而行之或勉強而行之及其成功一也

強上聲

知之者之所知行之者之所行謂達道也以其分而
言則所以知者知也所以行者仁也所以至於知之
成功而一者勇也以其等而言則生知安行者知也學

知利行者仁也困知勉行者勇也

語錄曰生知安行以知為主學知利

行以仁為主困知勉行以勇為主。又曰生知安行
主於知而言不知如何行安行者只是安而行之不
用著力然須是知得方能行得也學知利行主於仁
而言雖是學而知得然須是著意去力行則所學而

知得者不為徒知也。○陳氏曰：就知仁勇等級而言之，生知安行為知，知主於知，就知上教重，蓋先能知之而後能行之也。學知利行為仁，仁主於行，以行處為重，故知得須是行得也。困知勉行為勇，此氣質昏懦之人，昏不能知，懦不能行，非勇則不足以進道。蓋人性雖無不善而氣稟

有不同者，故聞道有蚤莫，行道有難易，然能自強不

息則其至一也。

語錄曰：就人之所稟而言，又有昏明清濁之異，故上知生知之資是氣清

明純粹而無一毫昏濁，所以生知安行不待學而能如堯舜是也。其次則亞於生知必學而後知必行而後至。又其次者資稟既偏，又有所蔽，須是痛加工夫，人一已百人，十已千，然後方能又亞於生知而及進而不已，則
呂氏曰：所入之塗雖異而所至之域則同，成功一也。

此所以為中庸若乃企生知安行之資為不可幾及
輕困知勉行謂不能有成此道之所以不明不行也
語錄曰今之學者本是困知勉行底資質却要學他
生知安行底功夫便是生知安行底資質亦用下困
知勉行功夫况是
困知勉行底資質

子曰好學近乎知力行近乎仁知恥近乎勇

好近乎知
之知並去

聲

子曰二字衍文。此言未及乎達德而求以入德之

事

文集曰上既言達德之名恐學者無所從入故又
言其不遠者以示之使由是而求之則可以入

德也聖人之言淺深遠近之序不可差次如此。真氏曰既言三達德又教人以入德之路夫智必上智仁必至仁勇必大勇然後為至然宜易達及哉苟能好學不倦則亦近乎知矣力行不已則亦近乎仁矣以不若人為恥則亦近乎勇矣蓋好學所以明理也力行所以進道也知恥所以立志也能於是三者用其功則所謂三達德者庶乎可漸致矣。愚通上文謂理之同得者為達德近此德者為入德

三知為知三行為仁則此三近者勇之次也

語錄曰交互說

三知都是知三行都是仁三近都是勇生知安行好學又是知學知利行力行又是仁困知勉行知恥又是勇。蔡氏曰三知主知三行主仁三近主勇生知者知之知也學知者仁之知也困知者勇之知也安行者仁之仁也利仁者知之仁也勉強行者勇之仁也好學者知之勇也力行者仁之勇也知恥者勇之

也勇 呂氏曰愚者自是而不求自私者徇人欲而忘反

懦者甘為人下而不辭故好學非知然足以破愚力

行非仁然足以忘私知恥非勇然足以起懦

三山陳氏曰所

謂力行足以忘私者蓋世之怠惰不為者皆所以自便其所欲故曰私

知斯三者則知所以脩身知所以脩身則知所以治人知所以治人則知所以治天下國家矣

斯三者指三近而言人者對己之稱天下國家則盡乎人矣言此以結上文脩身之意起下文九經之端

也蔡氏曰言修身而以治人治天下國家結之德必有道也言天下國家九經而以修身起之道必本

德也

凡為天下國家有九經曰脩身也尊賢也親親也敬大臣也體羣臣也子庶民也來百工也柔遠人也懷諸侯也

經常也三山陳氏曰施之治天下國體謂設以身處家可以常行而不變故曰經

其地而察其心也子如父母之愛其子也柔遠人所

謂無忘賓旅者也

陳氏曰遠人非四夷之謂如商賈賓旅之人皆是離其家鄉而來須

寬柔恤之

此列九經之目也呂氏曰天下國家之本在身

故脩身為九經之本

三山陳氏曰九經始於修身身既修則足以為萬事之本然

必親師取友然後脩身之道進故尊賢次之

陳氏曰不與賢者相

講磨如何能修身惟知尊敬賢者則見道理明○三山陳氏曰下文既有大臣又有羣臣而此又有尊賢之別者蓋此所謂尊者非臣之謂正書所謂能自得師禮所謂當其為師則不臣者也道之所

進莫先其家故親親次之

陳氏曰欲行道必先從家起

由家以及

朝廷故敬大臣體羣臣次之

陳氏曰由家而推之由朝廷則君使臣以禮由

朝廷以及其國故子庶民來百工次之由其國以及

天下故柔遠人懷諸侯次之此九經之序也

陳氏曰九經亦

鋪排有次序視羣臣猶吾四體視百姓猶吾子此視臣視

民之別也

脩身則道立尊賢則不惑親親則諸父昆弟不怨敬大臣則不眩體羣臣則士之報禮重子庶民則百姓勸來百工則財用足柔遠人則四方歸之懷諸侯則天下畏之

此言九經之效也道立謂道成於已而可為民表所

謂皇建其有極是也

愚謂有此一句方生得下面許多事

不惑謂不疑

於理

陳氏曰是理義昭著無所疑也

不眩謂不迷於事敬大臣則信

任專而小臣不得以間之故臨事而不眩也

陳氏曰是信任

專政事舉無所眩迷也

來百工則通功易事農末相資故財用

足

語錄曰既有箇國家則百工所為皆少不得都要用若百工聚則事事皆有豈不足以足財用乎如

織絰可以足市帛工匠可以足器皿之類

柔遠人則天下之旅皆悅而願

出於其塗故四方歸懷諸侯則德之所施者博而威

之所制者廣矣故曰天下畏之

齊明盛服非禮不動所以脩身也去讒遠色賤貨而貴德所以勸賢也尊其位重其祿同其好惡所以勸親親也官盛任使所以勸大臣也忠信重祿所以勸士也時使薄斂所以勸百姓也日省月試既稟稱事所以勸百工也送往迎來嘉善而矜不能所以柔遠人也繼絕世舉廢國治亂持危朝聘以時厚往而薄來所以懷諸侯

也

齊側皆反去上聲遠好惡斂並去聲既許氣反稟彼錦力錦二反稱去聲朝音潮

此言九經之事也

陳氏曰九經之事是做工夫處

官盛任使謂官屬

衆盛足任使令也蓋大臣不當親細事故所以優之者如此忠信重祿謂待之誠而養之厚蓋以身體之而知其所賴乎上者如此也既讀曰餽餽

稟稍食也

語錄曰餽牲餽也如今官員請受有生羊肉廩即廩給折送錢之類是也稱

事如周禮稟人職曰考其弓弩以上下其食是也往則為之授節以送之來則豐其委積以迎

之

語錄曰問授節以送其往曰遠人來至去時有節以授之過所在為照如漢之出入關者用繻唐謂

之給過所朝謂諸侯見於天子聘謂諸侯使大夫來獻王

制比年一小聘三年一大聘五年一朝厚往薄來謂
燕賜厚而納貢薄

凡為天下國家有九經所以行之者一也

一者誠也一有不誠則是九者皆為虛文矣此九經

之實也

潘氏曰三德行之者一所以實其德九經行之者一所以實其事

凡事豫則立不豫則廢言前定則不跲事前定則不困

行前定則不疚道前定則不窮

路其叔反行去聲

凡事指達道達德九經之屬豫素定也跲躓也

愚謂躓者

穢不疾病也此承上文言凡事皆欲先立乎誠如下

文所推是也

在下位不獲乎上民不可得而治矣獲乎上有道不信
乎朋友不獲乎上矣信乎朋友有道不順乎親不信乎
朋友矣順乎親有道反諸身不誠不順乎親矣誠身有
道不明乎善不誠乎身矣

此又以在下位者推言素定之意反諸身不誠謂反
求諸身而所存所發未能真實而無妄也

語錄曰反
諸身是反

求於心不誠是不曾實有此心如事親以孝須是實有這孝之心若外面假為孝之事裏面却無此心便是
是不誠矣 不明乎善謂未能察於人心天命之本然而真

知至善之所在也

潘氏曰雖無邪妄苟不合乎正理亦未免乎有善要之此亦是未知

至善之所在

誠者天之道也誠之者人之道也誠者不勉而中不思而得從容中道聖人也誠之者擇善而固執之者也
中

去聲從
七客反

此承上文誠身而言誠者真實無妄之謂天理之本

然也

語錄曰誠者都是實理了。又曰是自然底實是自然無妄之謂。又曰是天性之實然更無

纖毫

作為誠之者未能真實無妄而欲其真實無妄之謂

人事之當然也

語錄曰誠之者是實其實理。又曰恐有不實處便思去實他聖人

之德渾然天理真實無妄不待思勉而從容中道則

亦天之道也

陳氏曰聖人純是天理合下無欠闕處渾然無變動徹內外本末皆真實無一

豪之妄不待思而自得此生知也不待勉而自中此安行也且如人行路須是照管方行出路中不然則蹉向邊去聖人如不看路自然在路中間未至於聖則不行所謂從容無不中道此天道也

能無人欲之私而其為德不能皆實故未能不思而

得則必擇善然後可以明善未能不勉而中則必固

執然後可以誠身此則所謂人之道也

陳氏曰自大賢以下氣稟

不能純乎清明道理未能渾然真實無妄所以不能
無人欲之私惟其未能生知故知有不實必思而後
得未能安行故行有不實必勉而後中必思而得故
須做擇善工夫必勉而中故須做固執工夫擇善是
辨析衆理而求其所謂善固執是所守之堅而不為
物移未得善則精擇之既得善則固守之擇善是致
知之功固執是力行之功須是二者並行乃能至於
真實無妄此人道也○三山陳氏曰善而不擇則有誤
認人欲為天理者矣執之不固則天理有時奪乎人欲矣
不思而得生知也不勉而中安行也擇善學知以下之事固執利行以下之

事也

蔡氏曰不勉而中不思而得先言仁後言知擇善而固執之先言知後言仁亦可見聖人君子

之德而

不亂

博學之審問之慎思之明辨之篤行之

此誠之之目也學問思辨所以擇善而為知學而知

也篤行所以固執而為仁利而行也

語錄曰前而四項只是理會這

物事理會得後方去行。陳氏曰擇善有博學審問

謹思明辨工夫是儘用功多固執只有篤行一件土

夫是擇善處真能行之

程子曰五者廢其一非學也

則到行處功自易也語錄曰五者無先後有緩急不可謂博學時未暇審

問審問時未暇謹思謹思時未暇明辨明辨時未暇

篤行五者從頭做將下去
只微有差耳初無先後也

有弗學學之弗能弗措也有弗問問之弗知弗措也有弗
弗思思之弗得弗措也有弗辨辨之弗明弗措也有弗
行行之弗篤弗措也人一能之己百之人十能之己千
之

君子之學不為則己為則必要其成故常百倍其功

語錄曰此是言下工夫人
做得一分自己做百分

此困而知勉而行者也勇

之事也

語錄曰弗措却是勇事到得後面說人一己
百人十己千此方正說勇處○陳氏曰學

問思辨知之事篤行
仁之事弗措勇之事

果能此道矣雖愚必明雖柔必強

明者擇善之功強者固執之效

語錄曰雖愚必明是致知之效雖柔必強

是力行之效

呂氏曰君子所以學者為能變化氣質而已

德勝氣質則愚者可進於明柔者可進於強

陳氏曰是雖氣

稟十分愚而柔至此德勝氣質稟而能變化向也愚而今則明向也柔而今則強矣故學問須是氣質變化然後有以不能勝之則雖有志於學亦愚不能明柔復其初

不能立而已矣蓋均善而無惡者性也人所同也昏

明強弱之稟不齊者才也人所異也誠之者所以反其同而變其異也夫以不美之質求變而美非百倍其功不足以致之今以鹵莽滅裂之學或作或輟以變其不美之質及不能變則曰天質不美非學所能變是果於自棄其為不仁甚矣

語錄曰呂氏解得此段痛快讀之未嘗不

竦然警厲奮發人若有向學之志須是如此做工夫方得

右第二十章

黃氏曰此章當一部大學須著反覆看越看越好。又曰此章語甚宏博

其間語意若不相接而實倫理貫通善讀者當細心以求之求之既得則當優游玩味使心理相

涵則大而天下國家近而一身
無不曉然見其施為之次第矣

此引孔子之言以繼大舜文武周公之緒明其

所傳之一致舉而措之亦猶是耳

陳氏曰前說舜文武周公

能盡中庸之道此說孔子能盡中庸之道子思引此以明羣聖道統之相傳

蓋包費

隱兼小大以終十二章之意

葉氏曰此章以孔子告哀公之言推

廣中庸之道包費隱兼小大以歸於學問之本原

章內語誠始詳而所

謂誠者實此篇之樞紐也

黃氏曰中庸著簡誠字鎖盡。愚謂中庸一篇

無非說誠自篇首至十六章始露出誠之不可
拚一句然不過專說鬼神是以天道言之至此

章說許多事未乃說誠身工夫便是人又案孔道自此以下分說天道人道極為詳悉

子家語亦載此章而其文尤詳成功一也之下

有公曰子之言美矣至矣寡人實固不足以成

之也

葉氏曰哀公能問以政而不能行其言所謂從而不改說而不繹雖聖人未如之何

也故其下復以子曰起答辭今無此問詞而猶

有子曰二字蓋子思刪其繁文以附于篇而所

刪有不盡者今當為衍文也博學之以下家語

無之意彼有闕文抑此或子思所補也歟

或問二十章蒲盧之說何以廢舊說而從沈氏也
曰蒲盧之為果羸他無所考且於上下文義亦不
甚通唯沈氏之說乃與地道敏樹之云者相應故
不得不從耳曰沈說固為善矣然夏小正十月
玄雉入于淮為蜃而其傳曰蜃者蒲盧也則似亦
以蒲盧為變化之意而舊說未為無所據也曰此
亦彼書之傳文耳其他蓋多穿鑿不足據信疑亦
出於後世迂儒之筆或反取諸此而附合之決非

孔子所見夏時之本文也且又以蜋為蒲盧則不應二物而一名若以蒲盧為變化則又不必解為果蠃矣況此等瑣碎既非大義所繫又無明文可證則姑闕之其亦可也何必詳考而深辨之耶。曰達道達德有三知三行之不同而其致則一何也曰此氣質之異而性則同也生而知者生而神靈不待教而於此無不知也安而行者安於義理不待習而於此無所拂也此人之稟氣清明賦質

純粹天理渾然無所虧喪者也

陳氏曰此謂聖人地位

學而

知者有所不知則學以知之雖非生知而不待困也利而行者真知其利而必行之雖有未安而不待勉也此得清之多而未能無蔽得粹之多而未能無雜天理小失而能亟反之者也

陳氏曰此是大賢地位

困而知者生而不明學而未達困心衡慮而後知之者也勉強而行者不獲所安未知其利勉力強矯而行之者也此則昏蔽駁雜天理幾亡久而後

能反之者也

陳氏曰此又次等人地位

此三等者其氣質之稟

亦不同矣然其性之本則善而已故及其知之而成功也則其所知所至無少異焉亦復其初而已

矣

陳氏曰凡此皆隨其氣稟之不同然本然之性無有不善或生知或學知或困知及已知處則

一般或安行或利行或勉行及其行之成功則一般至此為能復其本然之初矣

曰張子

呂楊侯氏皆以生知安行為仁學知利行為知困知勉行為勇其說善矣子之不從何也曰安行可以為仁矣然生而知之則知之大而非仁之屬也

利行可以為知矣然學而知之則知之次而非知之大也且上文三者之目固有次序而篇首諸章以舜明知以回明仁以子路明勇其語知也不卑矣夫豈專以學知利行者為足以當之乎故今以其分而言則三知為智三行為仁所以勉而不息以至於知之成功之一為勇以其等而言則以生知安行者主於知而為智學知利行者主於行而為仁困知勉行者主於強而為勇又通三近而言

則又以三知為智三行為仁而三近為勇之次則

亦庶乎其曲盡也歟

語錄曰問諸說皆以生知安行為仁學知利行為知今反

是何也曰論語說仁者安仁知者利仁與中庸說知仁勇意思自別生知安行便是仁在知中學知利行便是仁在知外既是生知必能安行所以謂仁在知中若是學知便是知得淺些了須是力行方始至仁處所以謂仁在知外譬如卓子論語說仁便是直脚處說知便是橫檔處中庸說仁便是橫檔處說知又是直脚處且將諸說錄出看看這一邊了又看那一邊便自見得不相礙○

曰九經之說奈何曰不一其內則無以制其外不齊其外則無以養其內靜而不存則無以立其本

動而不察則無以勝其私故齊明盛服非禮不動
則内外交養而動靜不違所以為脩身之要也

陳氏

曰齊明以一於內盛服以肅其外内外交相養也齊
明盛服是靜而未應接之時以禮而動是動而已
應接之時動靜交相養也如此所以修其身○真氏
曰齊戒明潔所以正其心也盛服儼然所以正其
容也心正則容正故曰正其內所以制其外容正
則心亦正故曰齊於外者所以養其中此内外交
致其功也靜者未應物之時動者應物之際靜而
存養則有以全天理之本然動而省察則有以防
人欲於將萌此動靜兼用其力也然蔽以一言曰
敬而已矣内外動靜無乎不敬身安得而不修乎
信讒邪則任賢不專徇貨色則好賢不篤賈捐之

所謂後宮盛色則賢者隱微佞人用事則諍臣杜
口蓋持衡之勢此重則彼輕理固然矣故去讒遠
色賤貨而一於貴德所以為勸賢之道也

三山陳氏

曰有好賢之心而為讒諂之人貨色之欲奪之則
好賢之心衰而賢者去矣故必去讒遠色賤貨而
惟德之為貴然後親之欲其貴愛之欲其富兄弟
賢者肯為我留也

婚姻欲其無相遠故尊位重祿同其好惡所以為

勸親親之道也

三山陳氏曰親之欲其貴故必尊
其位愛之欲其富故必重其祿寧

適不來微我弗顧兄弟婚姻無
胥遠矣故必同其好惡也大臣不親細事則

以道事君者得以自盡故官屬衆盛足任使令所

以為勸大臣之道也

三山陳氏曰庶官無曠則大臣得以總其凡於上而以道

佐人主若官少不足以備任使則大臣將親細務而不暇於佐主矣盡其誠而恤其

私則士無仰事俯育之累而樂趨事功故忠信重

祿所以為勸士之道也

三山陳氏曰士者百官之總稱待之不以誠則

士不肯盡其心仕有時而為貧使仰事俯育之不能則士不肯盡其力此勸之道所以既先忠信而又當重祿也。愚謂苟無忠信而謂爵祿可以驕士則士有守死而不食其祿者其所得不過庸耳人情莫不欲逸亦莫不欲富故時使薄斂所以

為勸百姓之道也

三山陳氏曰使民以時而薄其稅使則民有餘力餘財而樂於

勸功

日省月試以程其能既稟稱事以償其勞則

不信度作淫巧者無所容情者勉而能者勸矣

三山

陳氏曰辨其苦良而制其食如棗人春獻素秋獻成書其等以饗工乘其事考其功以下上其食而誅賞之之類則工之不信度者既無所容而能者亦以見知而勸矣

為之授節以送

其往待以委積以迎其來因能授任以嘉其善不强其所不欲以矜其不能則天下之旅皆悅而願

出於其塗矣

語錄曰因能授任以嘉其善謂願留於其國者也

無後者續

之已滅者封之治其亂使上下相安持其危使大
小相恤朝聘有節而不勞其力貢賜有度而不匱
其財則天下諸侯皆竭其忠力以蕃衛王室而無

倍畔之心矣

真氏曰無後者續之如周武王立夏
商之後已滅者封之如齊桓公封衛

國凡此九經其事不同然總其實不出乎脩身尊
賢親親三者而已敬大臣體羣臣則自尊賢之等
而推之也子庶民來百工柔遠人懷諸侯則自親
親之殺而推之也至於所以尊賢而親親則又豈

無所自而推之哉亦曰脩身之至然後有以各當

其理而無所悖耳

陳氏曰其經常有九其實總者有三件三件合來其實歸一件

蓋敬大臣體羣臣其本從尊賢來子庶民來百工
柔遠人懷諸侯其本從親親來而親親尊賢之本

又從修身來

曰親親而不言任之以事者何也曰此親

親尊賢並行不悖之道也苟以親親之故不問賢

否而輕屬任之不幸而或不勝焉治之則傷恩不

治則廢法是以富之貴之親之厚之而不曰任之

以事是乃所以親愛而保全之也若親而賢則自

當置之大臣之位而尊之敬之矣豈但富貴之而已哉觀於管蔡監商而周公不免於有過及其致辟之後則惟康叔聃季相與夾輔王室而五叔者有土而無官焉則聖人之意亦可見矣曰子謂信任大臣而無以間之故臨事而不眩使大臣而賢也則可其或不幸而有趙高朱异虞世基李林甫之徒焉則鄒陽所謂偏聽生姦獨任成亂范曄所謂妬賢嫉能御下蔽上以成其私而主不覺悟者

亦安得而不慮耶曰不然也彼其所以至此正坐不知九經之義而然耳使其明於此義而能以脩身為本則固視明聽聰而不可欺以賢否矣能以尊賢為先則其所置以為大臣者必不雜以如是之人矣不幸而或失之則亦亟求其人以易之而已豈有知其必能為姦以敗國顧猶置之大臣之位使之姑以奉行文書為職業而又恃小臣之察以防之哉夫勞於求賢而逸於得人任則不疑而

疑則不任此古之聖君賢相所以誠意交孚兩盡其道而有以共成正大光明之業也如其不然吾恐上之所以猜防畏備者愈密而其為眩愈甚下之所以欺罔蒙蔽者愈巧而其為害愈深不幸而臣之姦遂則其禍固有不可勝言者幸而主之威勝則夫所謂偏聽獨任御下蔽上之姦將不在於大臣而移於左右其為國家之禍尤有不可勝言者矣嗚呼危哉曰子何以言柔遠人之為無忘賓

旅也曰以其列於懷諸侯之上也舊說以為蕃國之諸侯則以遠先近而非其序書言柔遠能邇而又言蠻夷率服則所謂柔遠亦不止謂服四夷也況愚所謂授節委積者比長遺人懷方氏之言掌之於經有明文耶。曰楊氏之說有虛器之云者二而其指意所出若有不同者焉何也曰固也是其前段主於誠意故以為有法度而無誠意則法度為虛器正言以發之也其後段主於格物故以

為若但知誠意而不知治天下國家之道則是直
以先王之典章文物為虛器而不之講反語以詰
之也此其不同審矣但其下文所引明道先生之
言則又若主於誠意而與前段相應其於本段工
文之意則雖亦可以宛轉而說合之然終不免於
迂回而難通也豈記者之誤耶然楊氏他書首尾
衡決亦多有類此者殊不可曉也

案楊氏曰天下國家之大不誠

未有能動者也雖法度彰明無誠心以行之皆虛
器也○又曰九經行之者一一者何誠而已然而

非格物致知烏足以知其道哉若謂意誠便足以平天下則先王之典章文物皆虛器也故明道先生嘗謂有闕雖麟趾之意然後可以行周官之法度正謂此耳○曰所謂前定者

何也曰先立乎誠也先立乎誠則言有物而不躐

矣事有實而不困矣行有常而不疲矣道有本而

不窮矣

陳氏曰此心之誠平時常常存在無少間斷乃前定之謂言據實物而出則不路躐

矣做事實有箇骨子則不困敗矣行終始如一無破病處矣道如源泉混混不舍晝夜自不窮竭矣

諸說惟游氏誠定之云得其要

案游氏曰惟至誠為能定惟前定為

能應故以言則必行以守則必成以行則無悔以道則無方誠定之敬如此張子以精

義入神為言是則所謂明善者也

案張子曰事像則立必有數以

先之盡教之善必精義以研之精義入神然後立斯立動斯和矣

○曰在下獲上

明善誠身之說奈何曰夫在下位而不獲乎上則無以安其位而行其志故民不可治然欲獲乎上又不可以諛說取容也其道在信乎友而已蓋不信乎友則志行不孚而名譽不聞故上不見知然欲信乎友又不可以便佞苟合也其道在悅乎親而已蓋不悅乎親則所厚者薄而無所不薄故友

不見信然欲順乎親又不可以阿意曲從也其道
在誠乎身而已蓋反身不誠則外有事親之禮而
內無愛敬之實故親不見悅然欲誠乎身又不可
以襲取強為也其道在明乎善而已蓋不能格物
致知以真知至善之所在則好善必不能如好好
色惡惡必不能如惡惡臭雖欲勉焉以誠其身而
身不可得而誠矣此必然之理也

三山陳氏曰此言必明善而後

身可誠必誠身而後親可順必順親而後友可信
必信乎友而後君信之必得乎君而後民可治也

邇而言之則君子之學求為有用本欲及人然不得乎君則不能安其位以行其道而得君之道非由容悅必素行信於朋友則名實加於上下矣信於友之道又非可以苟合也所厚者薄於親而不順朋友亦疑之矣然悅親之道又非止於奉養無違而已哉身所以敬親也反諸身而無不誠而後有愛敬之實矣至於誠身之道非真有見於此則好之必不篤辨之必不明有時而入於不善矣此誠身之道所以必始於明善也故夫子言此而其下文即以天道

人道擇善固執者繼之蓋擇善所以明善固執所以誠身擇之之明則大學所謂物格而知至也執之之固則大學所謂意誠而心正身脩也知至則

反諸身者將無一毫之不實意誠心正而身脩則
順親信友獲上治民將無所施而不利而達道達

德九經凡事亦一以貫之而無遺矣

輔氏曰始則大學之次序

終則中庸之極功

曰諸說如何曰此章之說雖多然亦無

大得失唯楊氏反身之說為未安耳蓋反身而誠
者物格知至而反之於身則所明之善無不實有
如前所謂如惡惡臭如好好色者而其所行自無
內外隱顯之殊耳若知有未至則反之而不誠者

多矣安得直謂但能反求諸身則不待求之於外而萬物之理皆備於我而無不誠哉況格物之功正在即事即物而各求其理今乃反欲離去事物而專務求之於身尤非大學之本意矣

案楊氏曰反身者及

求諸身也蓋萬物皆備於我非自外得反諸身而已反身而至於誠則利仁者不足道也○曰

誠之為義其詳可得而聞乎曰難言也姑以其名義言之則真實無妄之云也若事理之得此名則亦隨其所指之大小而皆有取乎真實無妄之意

耳蓋以自然之理言之則天地之間惟天理為至
實而無妄故天理得誠之名若所謂天之道鬼神
之德是也以德言之則有生之類惟聖人之心為
至實而無妄故聖人得誠之名若所謂不勉而中
不思而得者是也至於隨事而言則一念之實亦
誠也一言之實亦誠也一行之實亦誠也是其大
小雖有不同然其義之所歸則未始不在於實也

愚謂誠之一字有以自然之理言者有以德言者
有以事言者隨其所指之大小固有不同然皆有

取乎真實無妄之意論其大者天也只是是一箇誠字聖人也只是一箇誠字論其小者一物一事之實亦是誠一言一行之實亦是誠曰然則天理聖人之所以若是

其實者何也曰一則純二則雜純則誠雜則妄此

常物之大情也

陳氏曰凡物一色謂之純。又曰只一箇誠若不誠則二雜之矣

夫天之所以為天也沖漠無朕而萬理兼該無所不具然其為體則一而已矣未始有物以雜之也是以無聲無臭無思無為而一元之氣春秋冬夏晝夜昏明百千萬年未嘗有一息之繆天下之物

洪纖巨細飛潛動植亦莫不各得其性命之正以生而未嘗有一毫之差此天理之所以為實而不

妄者也

陳氏曰天道流行自古及今無一毫之妄暑往則寒來日往則月來春生了便夏長

秋殺了便冬藏元亨利貞終始循環萬古常如此皆理之真實處凡天下之物洪纖高下飛潛動植青黃黑白萬古皆常然不易如以木葉觀之缺者常缺圓者常圓修者常修短者常短無一毫差錯便待人力十分安排揆造來終不相似都是真實道理自然而然

若夫人物之生

性命之正固亦莫非天理之實但以氣質之偏口

鼻耳目四支之好得以蔽之而私欲生焉是以當

其惻隱之發而被害雜之則所以為仁者有不實
矣當其羞惡之發而貪昧雜之則所以為義者有
不實矣此常人之心所以雖欲勉於為善而內外
隱顯常不免於二致其甚至於詐偽欺罔而卒墮
於小人之歸則以其二者雜之故也惟聖人氣質
清純渾然天理初無人欲之私以病之是以仁則
表裏皆仁而無一毫之不仁義則表裏皆義而無
一毫之不義

語錄曰聖人之生其稟受渾然氣質
清明純粹全是此理更不待修為而

與天為一。又曰：天無不實，寒便是寒，暑便是暑，更不待使他恁地。聖人仁便真箇是仁，義便真箇是義，無其為德也。固舉天下之善而無一事之或不實處。

遺而其為善也，又極天下之實而無一毫之不滿。此其所以不勉不思，從容中道而動容周旋莫不中禮也。曰：然則常人未免於私欲而無以實其德者，奈何？曰：聖人固已言之，亦曰：擇善而固執之耳。夫於天下之事皆有以知其如是為善而不能不為，知其如是為惡而不能不去，則其為善去惡之

心固已篤矣於是而又加以固執之功雖其不睹
不聞之間亦必戒謹恐懼而不敢懈則凡所謂私
欲者出而無所施於外入而無所藏於中自將消
磨泯滅不得以為吾之病而吾之德又何患於不
實哉是則所謂誠之者也曰然則大學論小人之
陰惡陽善而以誠於中者目之何也曰若是者自
其天理之大體觀之則其為善也誠虛矣自其人
欲之私分觀之則其為惡也何實如之而安得不

謂之誠哉但非天理真實無妄之本然則其誠也

適所以虛其本然之善而反為不誠耳

語錄曰問誠於中形

於外是實有惡於中便形見於外然誠者真實無妄安得有惡有惡不幾於妄乎曰此便是惡底真實無妄善便虛了誠只是實而善惡不同實有一分惡便虛了一分善實有二分惡便虛了二分善
曰諸說如何曰周子至矣其上章以天道言其下

章以人道言愚於通書之說亦既略言之矣

案周子

章曰誠者聖人之本大哉乾元萬物資始誠之源也乾道變化各正性命誠斯立焉純粹至善者也故曰一陰一陽之謂道繼之者善也成之者性也元亨誠之道利貞誠之復大哉易也性命之源乎

○下章曰聖誠而已矣誠五常之本百行之源也靜無而動有至正而明達也五常百行非誠非也邪暗塞也故誠則無事矣至易而行難果而確無難矣故曰一日克己復禮天下歸仁焉○愚案朱子謂上章言太極陰陽五行下章言程子無妄之太極之在人者此兩語已括盡大意

云至矣

案程子曰無妄之謂誠不欺其次矣○語錄曰無妄是我無妄故誠不欺者對物而

言故次之無妄是自然之誠不欺是著力去做底

其他說亦各有所發明

案程子曰誠者天之道敬者人事之本敬者用也敬則誠○又曰主一之謂敬一者之謂誠敬則有

意

在讀者深玩而默識焉則諸家之是非得失不能

出乎此矣○曰學問思辨亦有序乎曰學之博然

後有以備事物之理故能參伍之以得所疑而有
問問之審然後有以備師友之情故能反復之以
發其端而可思思之謹則精而不雜故能自有所
得而可以施其辨辨之明則斷而不差故能無所
疑惑而可以見於行行之篤則凡所學問思辨而
得之者又皆必踐其實而不為空言矣此五者之

序也

陳氏曰學不止於博覽羣書凡天下事事物物道理皆須一一理會故曰博問不可粗略

須是詳審凡事物之理紛綸文錯輕重淺深看端的可疑是何處然後問乃能盡師友之情而疑可

釋故曰審思不可泛濫而失之放蕩須是謹思則能精而不雜然後實有得于心實有所得則可以辨別衆理毫分縷析自然精明不差自學問思辨至此見得道理真實分曉然後篤力而行之則所以踐其實而不為空言此五者不可廢一然亦有次序須從博學起又須經四節目道理方真知所謂至善所在知得端的確然不可易然後守之方可牢固○三山陳氏曰學之博而後有疑有疑然後有問既問而反求諸己然後有思思而有所未安則必尚辨析以精之既精矣然後可以從事於行苟無志於學則已志於學而不序進於此五者則亦自棄之人也

曰呂氏之說之詳不亦善乎曰呂氏此章最為詳實然深考之則亦未免乎有病蓋君子之於天下必欲無一理之

不通無一事之不能故不可以不學而其學不可
以不博及其積累而貫通焉然後有以深造乎約
而一以貫之非其博學之初已有造約之心而姑
從事於博以為之地也

案呂氏曰君子將以造其約則不可不學學以聚之

聚不博則約不可得博學而詳說之將以反說約也為學之道造約為功約即誠也不能至是則多聞多見徒足以飾口耳而已語誠則未也至於學而不能無疑則不可

以不問而其問也或粗略而不審則其疑不能盡
決而與不問無以異矣故其問之不可以不審若

曰成心亡而後可進則是疑之說也非疑而問問

而審之說也

案呂氏曰學者不欲進則已欲進則不可以有成心有成心則不可與進

于道矣故成心存則自處以不疑成心亡然後知所疑矣小疑必小進大疑必大進蓋疑者不安於故而進於新者也如問之審審而知則達孰禦焉

學也問也得於外者也

若專恃此而不反之心以驗其實則察之不精信之不篤而守之不固矣故必思索以精之然後心與理熟而彼此為一然使其思也或太多而不專則亦泛濫而無益或太深而不止則又過苦而有

傷皆非思之善也故其思也又必貴於能謹非獨

為反之於身知其為何事何物而已也

紫呂氏曰不致吾思

以反諸身則學問聞見非吾事也故知所以為性知所以為命反之於我何物也知所以為名知所以為義反之於我何事也故曰思則得之不思則不得也慎其所以思必至于得而後已則學問聞見皆非外鑠是其餘則皆得之而所論變化氣質乃所謂誠也

者尤有功也。曰何以言誠為此篇之樞紐也曰

誠者實而已矣

語錄曰誠是實理自然不假修為者也

天命云者實

理之原也

通書解義曰天之所賦物之所受皆實理之本然無不善之雜

性其在

物之實體道其當然之實用而教也者又因其體
用之實而品節之也不可離者此理之實也隱之
見微之顯實之存亡而不可揜者也戒謹恐懼而
謹其獨焉所以實乎此理之實也中和云者所以
狀此實理之體用也天地位萬物育則所以極此
實理之功效也中庸云者實理之適可而平常者
也過與不及不見實理而妄行者也費而隱者言
實理之用廣而體微也鳶飛魚躍流動充滿夫豈

無實而有是哉道不遠人以下至於大舜文武周

公之事孔子之言皆實理應用之當然而鬼神之

不可揜則又其發見之所以然也

陳氏曰自天地以至人物小者

大者皆是真實道理如此○愚謂朱子言萬理皆實又言實理者合當決定是如此其誠之謂歟

聖人於此固以其無一毫之不實而至於如此之

盛其示人也亦欲其必以其實而無一毫之偽也

蓋自然而實者天也必期於實者人而天也誠明

以下累章之意皆所以反復乎此而語其所以至

於正大經而立大本參天地而贊化育則亦真實

無妄之極功也

通書解義曰聖人之所以聖不過全此實理而已

卒章尚

絅之云又本其務實之初心而言也內省者謹獨

克己之功不愧屋漏者戒謹恐懼而無己可克之

事皆所以實乎此之序也時靡有爭變也百辟刑

之化也無聲無臭又極乎天命之性實理之原而

言也

黃氏曰中庸前面教人做工夫中庸又怕人做得不實故教之以誠到衣錦尚絅以後又

歸天命之謂性處


蓋此篇大指專以發明實理之本然欲

人之實此理而無妄故其言雖多而其樞紐不越

乎誠之一言也

黃氏曰道皆實理人惟誠足以盡道至此中庸一篇之義盡矣鳴

呼深哉



中庸纂疏卷二